

Kiptani: Bible for Luke

Formatted for Translators

©2022 Wycliffe Associates

Released under a Creative Commons Attribution-ShareAlike 4.0 International License.

Bible Text: The English Unlocked Literal Bible (ULB)

©2017 Wycliffe Associates

Available at <https://bibleineverylanguage.org/translations>

The English Unlocked Literal Bible is based on the unfoldingWord® Literal Text, CC BY-SA 4.0. The original work of the unfoldingWord® Literal Text is available at <https://unfoldingword.bible/ult/>.

The ULB is licensed under the Creative Commons Attribution-ShareAlike 4.0 International License.

Notes: English ULB Translation Notes

©2017 Wycliffe Associates

Available at <https://bibleineverylanguage.org/translations>

The English ULB Translation Notes is based on the unfoldingWord translationNotes, under CC BY-SA 4.0. The original unfoldingWord work is available at <https://unfoldingword.bible/utn>.

The ULB Notes is licensed under the Creative Commons Attribution-ShareAlike 4.0 International License.

To view a copy of the CC BY-SA 4.0 license visit <http://creativecommons.org/licenses/by-sa/4.0/>

Below is a human-readable summary of (and not a substitute for) the license.

You are free to:

Share — copy and redistribute the material in any medium or format. Adapt — remix, transform, and build upon the material for any purpose, even commercially.

The licensor cannot revoke these freedoms as long as you follow the license terms.

Under the following conditions:

Attribution — You must attribute the work as follows: "Original work available at <https://BibleInEveryLanguage.org>."

Attribution statements in derivative works should not in any way suggest that we endorse you or your use of this work.

ShareAlike — If you remix, transform, or build upon the material, you must distribute your contributions under the same license as the original. No additional restrictions — You may not apply legal terms or technological measures that legally restrict others from doing anything the license permits.

Notices:

You do not have to comply with the license for elements of the material in the public domain or where your use is permitted by an applicable exception or limitation.

No warranties are given. The license may not give you all of the permissions necessary for your intended use. For example, other rights such as publicity, privacy, or moral rights may limit how you use the material.



Luke

1

¹Amu kikukoji eunekwak cha chang kutat ng'alek akubo tukuchoche kikusulta togol mu kwenunyo, ²kile yo kikonech ache kibaorinik cho kikoro king'ete tai, ako cho ki kibaitinik cho bo ng'olyonde. ³Kiaro anenda ole kararan, atetung mu sire kikaanai anenda wolo kipkanda tuguk togol kungete tai, ee inye nyo itogunot Teopilo, ⁴Si neityo inai mu iman ng'aalechoche kikeneting. ⁵Kimi mu betusiek cho bo Herod laitoria nyobo Judea, tisinde aka nyo kikure Zakaria nyobo aretab Abija; ako kitinye chepyosa nyo kisalu kap Haron, kainenye ku ki Alsabet. ⁶Ako kibo iman icheka tuwai mu tai nyobo Jehova, kibetote mu ng'atutik togol ako ng'ate nyibo kiptaya, kimatinye ng'oki. ⁷Ako kimatinye lakwa, amu ki son Alsabet aku kikakuyositu tuwai. ⁸Ak kinemi rokondap kaptisisio mu tai nyibo Jehovah kile tate nyebo ripsenyi. ⁹Kule biteetap rokondap tiseinot ku kikilewen inyenda kuo Kapkoros kubel korosek (nyamdutik). ¹⁰Ako kimito bik chachang sang kusoe netese tai mu sait nyo kikibele korosek. ¹¹Ako king'eetyi Malaikaya nyibo Kiptayandenyo aku tonone kamastap tai nyibo kapkorusu nyokibele korosek. ¹²Aku kineri Zakaria malaikayndani, ku kichol kisob. ¹³Aku kilechi Malaikayande Zakaria, amechol amu kakekosung sautikuk. Tikisiche chepyoseng'ung' Alsabet lakwa nyo weri ak ikure kainenye Johana. ¹⁴Aku inyoru boiboyo ako cherat, aku boiboitu bik chachang amu sikwenyu. ¹⁵A mu mu tai kiyeku chi nyo oou mu konyekaap yaintenyo, yeku nyimo yee divai nda ku komen, aku kinyite tamirmirie nyo tilil kung'ete kimi moetap kamitenyi. ¹⁶Aku wekyini lagok cho bo Israel chachang kinai Jehovah Yaindeng'wang'. ¹⁷Ak kuwetoto mu taitap togenyi mu tamirmir ako kimnon nyobo Elija, si kuweech muguleiwiek cho bo abotinak kuro lakok ak kuwal ng'elelik si kiba mung'omnon nyobo iman, si kichob bik cho chobotin mu Jehova. ¹⁸Ako kiteeb Zakaria malaikayande kile, "Anae nee ng'olyondoni? amu ane ku kikayositu ako kikuchang'it kenysisiek chebo chepyosenyu." ¹⁹Aku kiwolji malaikyande kileji, "Ane oi Gabriel nyo atonone mu tai nyobo Jehova kakiyokwo, sang'ololung ak aibung' ng'aal cho kororonen. ²⁰Mi kile nyi, namaksaing' kot amemuche ing'alal agoi betu nyo oyegisot ng'aalechu amu meyan ng'alechu cho mu tai kuoyekisho. ²¹Aku kikany bik Zakaria Kutu chosho amu kikaigei mu kaptisisie. ²²Ako kineng'etu sang', mamuch king'alanji bik, aku kinai bik kile, kakuro kiy nyibo kwong'ut mu kaptisisie, ak king'alanji bik mu eun, aku kitebo kipnamkot. ²³Ako kine wany betusiek chebo rokondap kaptisio kuwo kaitanyi. ²⁴Aku kinesirto betusiechoche kimanach Alsabet chepyosenyi ako kiunyegei aroik mut ak kimwa kile, ²⁵" ki iywa kile nyenye Kiptaya mu betusiek cho kibkata si ki istoegeri rengso nyebo biich. ²⁶Aku kiyokto Jehovah malaika Gabriel arawetab lo kuwo nganasetab Galili nyo kikure Nazaret, ²⁷Kuwo wolo kimito chepto nyo kitomo kutuyo ako muren aka togol kibate kika echamji muren nyo kikure Joseph nyibo kotab ambo Daudi. Chebone kiberegei ku kikukure Maria. ²⁸Aku kicho malaikayande wolo mi chebone akukat, ak kileji, "Inye nyo iberurot mising! mi Kiptaya kuboting." ²⁹Aku kineri Malaikayande kuimgei akutebgei kile yekune ng'olyondoni ako kakatyon. ³⁰Aku kileji Malaikayande inyenda, "matiywai, Maria, amu ki inyoru chamat mu Jehovah. ³¹Rokee, imanache ak isich weri. Ak ikure kainenye 'Jeiso'. Yeku nyo ou inyenda akekure weritap inyenda nyotoror kisir togol. Kochini Kiptayande luge nyo kibo ³²Daudi. ³³Aku boyu kotab Jakobo akoi, amoboku boyunatenyi. ³⁴Aku kileji Maria Malaika, "Teptoi ano ng'olyondoni kemwowo, amu monget muren?" ³⁵Ako kiwolji malaikayande kileji, " chorjiningei tamirmirie nyo tilil ak inyoru urwetab kamuka nyobo inyenda nyotoror, nyone anyu kekure nyo tilil weritab Jehova, inyende nyo kisiche. ³⁶Rogee, manakat weri kira tupchengung Alsabet, nyenye ku arawetab lou, wet kisiche wweri inyende mu yosindanyi nyo kika kukure son. ³⁷Amu mu Jehova ku momi kiy nyo momucheke." ³⁸Ako kile Maria, " rogee, aii otwokinde nyobo Kiptayande, nguyak kiy aka togol kileyo chame." Ako kibakakta malaikayande inyende. ³⁹Ako king'eet Maria betusiechoche kuchakta akoi taun nyoboo Juda nye kimi koretap tulonik. ⁴⁰Ako kiwo kap Sakaria ak kutoroch Alsabet. ⁴¹Ako kinekas Alsabet torochetab Maria, kibiren lakwe mu moenyi ak kinyiy inyende tamirmirye nyo tilil. ⁴²Ako king'alal mu kutii nyo ou, kile itinye berur mu Jepyosok, ako iberurot inyende nyo isiche kung'ete moengung. ⁴³Ako kile, kiyekundo ano ng'olyondoni, kutu cho iyotap kiptayandenyo? ⁴⁴Amu, rogee, yo kineit itikyu ng'olyo nyobo torocheng'ung kibiren lakwe mu moenyi mu boiboio. ⁴⁵Ako iberurot chebone ki itejini amu iyekse ng'alek cho ki kimwoji inyenda cho ng'ete yain. ⁴⁶Ako kile Maria, " losu sobondanyu Yain, ⁴⁷Ako baibai tamirmirienyu amu Jehova sorunindenyo. ⁴⁸Amu karo nyarate nyebo otwokindenye nyo chepto, amu rokee, kingete rani ku kureno abenwok togol nyo baibai. ⁴⁹Amu ka kuyiwa kamuktainde nyo bo kamuktae togol ako tilil kainenye. ⁵⁰Ako tebe rirkeinyi kung'ete aben akoi aben. ⁵¹Kikubor kamukenye mu eunyi, ako kikoseer chomentos mu kabwotutikab muguleiyekwak. ⁵²kakuwolune kiptainak mu ng'achorokwak, ako kikutoror chonyerotin. ⁵³Kakunyityi cho rabosot tukuk cho kororon, akuon makorek kiba kilen. ⁵⁴Kikutoret otwokindenye Israel si kubkat rirkeinyi ⁵⁵(kile yo king'alalji abotinekyo) mu Abraham ako kasuyekji mu akoi. ⁵⁶Ako kitebo Maria ako Alsabet lekit aroik somok, ako kinepata kiwo konyi. ⁵⁷Ki it anyu betu nyokiyam kisikisio Alsabet ako kisich weri. ⁵⁸Ako kikas anyu chebo kwokenyi ako chebo arenye akubo borot nyo kinyoru inyende mu rireno nyebo Yaindenyo ako kiboiboitu kiboto inyende. ⁵⁹Ako kineit anyu betutap sisit kibka kumuratan lakwe. Kimache kikure 'Sakaria' kainetab abonyi. ⁶⁰Ako kiwolu iyonyi kile, "olo aku kikure Johana." ⁶¹Ako kileji bik inyenda, "momi chi mu areng'wong nyo kikure kainani. ⁶²Ako king'alalji bichoche abotap lakwemu eun kitebe kaine nyo meche kekure. ⁶³Ako kisom akubo nyo kisire ak kisir, "kainenye ku Johana." Ako kikwong'io bik togol. ⁶⁴Ako kiyatak kutinyi banone ako kitalkisit ng'elyeptanyi. Ako king'alal kulosu Jehovah. ⁶⁵Kichonji cholotio cho kimeng'isie kuboto icheka, ako kikimwaita ng'alechu togol kiyomu koretap tulon nyebo Judea. ⁶⁶Ako ng'alek cho kikas togolko kikonore mukuleiyekwak kutebekei kule, "yekune lakwani?" Amu kimito eutab Yainde kiboto inyenda. ⁶⁷Ako kinyii tamirmire nyo tilil abonyi Sakaria, ako king'orso kile, ⁶⁸" Berurot Yainde Jehova, nyebo Israel, amu

kakurutochi bikyi ako kakutiach.⁶⁹ Ako kakung'et kuino nyobo torornot mu kotab Daudi kayokindenye⁷⁰ (kile yo king'alal mu kutuwaikap orkoikiyo cho tililen, cho kimi king'ete ku kakitou ng'wenye),⁷¹ kisoruech mu bunikiyo, ako mu eunakap togol cho sasech.⁷² Sinetyo kirire sikikiyo akubkat rirkeinyi nyo tilil,⁷³ Sirbene nyo kisirbenji sikindenye Abraham.⁷⁴ Si kumuch kukonech, ku kakusoruech mu eunekap bunikiyo, si ke oot inyenda ku mo kiyweise⁷⁵ Mu tililin ako mu iman mu tainyi mu betusiekap sobenyo togol.⁷⁶ Ako inye lakwani, kikurening orkoikiyo nyobo inyenda nyotoror mising amu iweti mu tai nyobo kiptaya, indoe si neityo isat oretinekiyo,⁷⁷ si kochi bikyi nao nyobo yetuno mu nyoab kaat nyobo tengekwekwak.⁷⁸ Mu mugulei nyo riregei nyobo Jehova nyonyo,⁷⁹ si kkukweny icheka cho mi tuin ako cho mi uruo nyobo meei si kundochi kelyekyo kutu iit aretap kalye.⁸⁰ Ako kinar lakwanone ako kitesak kimnate mu tamirmirie ako kimeng'ote surkwen akoi betu nyo kiborjigei Israel.

2

¹King'ete anyu ng'atutie Kaisari Augusto mu betusiechoche kile kesir kainakap bik togol cho soopsot mu kore. ²Nyo bo tai sirisioni yo ki bauninde Suria, Kureno. ³Kiba anyu toggol si kesir chi togol mu ng'anasenyi. ⁴Kiilong'u ambo Joseph mu Galili king'et ng'anase nyobo Nasaret akoi Judea kutu it ng'anase nyobo Daudi nyo kikureBethlehem amu kibo inyenda kotab Daudi amu kibo arenyi. ⁵Si kisich kesir inyendakuboto murarenyi Maria nyo ki chi oou. ⁶Ako kiit siketap lakwe kutu kumi wolone. ⁷Ako kisich werinyi nyobo tai akulaakiyo ngg'uroik chebo lakwandi akuu mukonji kaptich amu kimo mi boroin mu kotap teek. ⁸Ako kimi koronone mesewek cho kitebisot mu kewe kiribe akweng'wang nyobo kechir kemoi. ⁹Aku kitonon malaika nyobo Kiptayande mu wolo legite kicheka, ako king'eleji lilindo nyobo Kiptayande komoswok togol: kucholyo anyu ksob. ¹⁰Ako kileji malaikayande kicheka, "Kitimocholyo; orokee, aibkok logoi cho koronen chobo boiboioyo nyo ou choityini biko togol. ¹¹Amu kikesikwok Yetinde rani mu meng'ote nyobo Daudi! nyone ku Kristo Kiptayande! ¹²Ako nyi koborune mu akwe, aba anyoru lakwe nyo kikilakiyo ng'oroik chebo lakwandi akurwe Kapng'ereb. ¹³Aku kimito mu banine kibote malaikayandanone lugosiek chachang chebo kipsengwet kulosu Jehovah kibere, ¹⁴Bo tegisto Jehovah mu wolo toror kisob ako kalya mu ng'wony mu bik cho chomotin mu kinyenda. ¹⁵Ako kine kakuwektakei malaikainak kuba kipseng'wet, kilejigei mesewechoche, ngeba akoi Bethlehem, si neityo kero ng'olyontoniinyi kakuuayak nyo kakuboruech kiptayande. ¹⁶Aku kibka anyu kuchoku, ako kinyoru Maria ako Joseph ako lakwe kurwe kapng'ereb. ¹⁷Ako kineru kumwaita ng'olyonde nyo kakemwachi akubo lakwanone. ¹⁸Ako kikwong'io togol cho kikas ng'alechoche kimwachi mesowek. ¹⁹Ako kirib Maria ng'alechoche togol kunonote mu mukuleitanyi. ²⁰Aku kikatitakei anyu mesowek, kutorore Jehovah ak kulosunote mu tuguk togol chekigas ako chokiro, kile bani kikakimwoji kichega. ²¹Aku kineit betusiek sisiit cho kimuratane kinyenda kekure kainenye Jeso kile bani kika kumunji malaikaayande kutomo kemanach. ²²Ako kine kakusirto betusiek chebo katilileng'wang kile ng'atutie nyobo Musa, kumutu inyende kucho Jerusalem si kegoji Kiptayande. ²³Kile yo kikiisir mu ng'atutie nyobo kiptayande kele kikuure nyo tabanat akubo kiptayande weri aka togol nyo yote yiote. ²⁴Ako kikoito korosionde kile yo kikimwa mu ng'atutie nyobo kiptayande kele cheptukenik aeny nda ku warek aeny chebo cheptuken. ²⁵Ako arokee, kimi chito aka Jerusalem nyo kikikure Simion ako ki chi nyobo iman ako kikonyite Jehovah, nyo kikenye kakaika nyobo Israel ako kitabe mu Tamirmirie Nyotilil inyende. ²⁶Ako kika kung'anji Tamirmirie Nyotilil inyende kile moroti meei kutomo kuro Kristo nyobo Yainde. ²⁷Kicho anyu hekalu mu Tamirmirie ako kinemutu sikik lakwe Jeso si neityo kugochi inyende kile atepto nyobo ng'atutie. ²⁸Kinam anyu lakwe mu eunekyi ako kilosu Jehova kile, ²⁹Ee Kiptayande, ichamjiini ra otwokindeng'ung kuwo mu kalya kile ng'olyondeng'ung. ³⁰Amu kakuro konyekju yetunengu'ung, ³¹nyo kiitat mu tai nyobo bik togol. ³²Lapkeiyo nyobo ng'atutie nyo king'anjini bororosiek ako torornot nyobo bikuk Israel. ³³Ako kikwong'io Joseph ako kame nyobo lakwe akubo tukuchoche kikamwa akubo inyende. ³⁴Aku kiberur Simion kicheka akileji Maria Kamenyi, rooke kakikochi lakwani si kubuty cha chang ak kung'eetyo cha chang mu bikab Israel, ako kaborune nyikitaye. ³⁵Ambo inyende mu tai kutore rotwetap chok muguleitang'ung si neityo kuyategis kabwatutik chebo muguleiywek chebo biko cha chang. ³⁶Ako kimite akob Anna cheptap Panuel, nyo ki maotio nyobo aretap Aser nyo kikakuyosit kisob. ³⁷Aku kiitebo kile mosok kenyisiek tamonwok sisiit ako ang'wan ki mang'etitoi sang nyobo kapkoros akiloosu, kirukutegei kuboto somutik kemoi ako bet. ³⁸Ako kicho mu betunone akukochi Jehovah kongoi ako kingalalji togol cho kikenye katiaga mu Jerusalem akubo inyende. ³⁹Ako kine kakuwany togol kile ng'atutie nyobo Kiptayande, kiwektakei kiba Galili akoi emeng'wang Nasaret. ⁴⁰Ako kinar lakwe, ako kitasak kimnate ako kinyiy ng'omnate ako kimi miendo nyobo Jehova kiboto Inyende. ⁴¹Kicham Kibeti sikikiyo kenya aka togol Jerusalem mu tumto nyobo pasaka. ⁴²Ako kinebo kanyisiek taman ako aeny kilaany icheka Jerusalem kile atabe nyobo tumto. ⁴³Ako kinewong'u betusiek cho weektoekei kung'etu lakwe Jeso mu Jerusalem ako kimanai sikikji. ⁴⁴Ako kibere mi kiboto bik cho kibeti togol kiba anyu bandap betu kimugul ako kiwas inyende mu kwenutap bikap areng'wang ako cho kingetkei. ⁴⁵Ako kinemonyoru inyende kuwektakei Jerusalem, kuwasata. ⁴⁶Kiop wolobo betusiek somok sikenyorji inyende kapkoros. ⁴⁷Ako kineboku betusiek somok kunyorji inyende kapkoros kitabe mu kwenu nyobo konet, kukase ng'alekwak aku teepse icheka. Kikwong'io togol akibo ng'omnatenyi ako wolutakji. ⁴⁸Bani Kiro kinyenda, kukwong'io. Kileji kamenyi, "Weri, amunee si aiywech kile nyi? Rokee, kikiwasating ako abong'ung' nyibo kwong'ut." ⁴⁹Kileji kichega, amune sawasata? Kimanaikwe kile kimagat aiy boisionikab Aboonyu? ⁵⁰Aku kimanai kichega kiyo kimwoe mu ng'alechoche. ⁵¹Kuwektage anyu ga Nazaret aku kigonyite kichega. Kugonorta kamenyi mu mugulaitanyi tuguchwechu togol. ⁵²Aku kitatai Jeso kinar mu ng'omnate ako atepto, akutasak mu chametab Jehovah ako biiko.

3

¹Ako mu keniyitap taman ak mut nyebo laitornate nyebo Tiberio Kaisare-yo ki bouninde nyebo Judea, Pontia Pilato ak Herod ku ki kiruokinde nyebo Galili ak ki iruokinde nyebo Iturea ako Trakoniti, Pilipu tupchetap Herod, ki Lusania kiruokinde nyebo Abelene, ²mu betusiek chebo tisikcho eechen, Anas ako Kaipas, kuitiyi anyu ng'olyonde nyebo Jehova Johana weritap Sakaria mu surkwen. ³Ako kicho kamoswek togol che bo tabonwokik che bo Jordan kuomtote akubo kabatisane ak sikuno nyebo nyoetab kaat nyebo tengekwok. ⁴Kile yo kikisir mu bukui nyebo ng'alek chebo orkoiyonde Isaya kele, "Kut nyebo chi nyo nyowoje mu surkwen kibare, ataaretap Kiptayande, ochuloote wolo werote." ⁵Mu let kelong'u keewe aka togol ak kira kiribibe tulwe akatogol nyo oou ako nyo mining, ⁶ako mu let kuroti bik togol torornot nyebo Jehovah. ⁷Kimwochi anyu tuiyosiek cho kibeti wolo mi inyenda, si kubatisan kileji aya akwe lagok che bo erenoi chebo ng'wono, ng'oniyi kotewok arwouno nerek cho mi tai? ⁸Oyiyo anyu beek choyemekei ako sikuno amotou amwa mu mukuleiywekwok ole, kitinye abonyo Abraham, amu amwowok ole mu koichu kumuche Jehovah kung'etyi Abraham lakoi. ⁹Ambo ra ku kakikonor aiywe tikitekap ketik, nyone anyu, keti aka togol nyo mayee beek cho kororon, keyebe ak kewirji ma. ¹⁰Ako kitebe inyende bik che kimi tuiyosiek kile, "kiai ne anyu?" ¹¹ako kiwolji icheke kileji, "inyende nyo tinye sumbotik aeny, kukoji nyo matinye, aku nguai kile nyone akob nyotinye cho kiambe." ¹²Ako kibka akob cho kitoche koti si kebatisan, ak kileji inyenda, "konetindoni, kioyache nee?" ¹³ako kimwochi icheka kileji, amamake bik tuguk cho sire cho kiking'at. ¹⁴Ako kitebe akob askarik kileji, "kiai nee acheka? ako kileji amomui chi aka togol, nda asare chi kiy ak ng'uyamak melekwekwok. ¹⁵Ako ki ne mi bik kukanye kito nyo iyake ak kukerere met mu mukuleiywekwak bik togol akubo Johana, kibare ngutos Kristo inyenda. ¹⁶Kiwolji Johana icheka togol kileji, "abotisenok mu beek iman, ako choni inyenda nyo kim kusiuro, nyo momuchino atiach anok che bo kweyoniki, batisenok inyenda mu tamirmirie nyo tilil ako mat. ¹⁷Tinye mu eunyi ako tilile kukaram ng'wonyu ak kuyumji nganok chokenyi ak kibeel. ¹⁸Kiamji anyu bik logoik chokororonen kiboto kotukonut alak cha chang. ¹⁹aku kine kakukar kong Johana kirwokinde Herod akubo Herodia Chepyose nyibo wering'wang, ak akubo tukuk togol cho yaachen cho kikakuai Herod. ²⁰Kitesyi nyenyi anyu chu togol, kukochi kukar Johana mu kaprotut. ²¹Ako kine kakebatisan bik togol, ak kakebatisan ambo Jesiso, ako kinesoe kuyatak kipsengwet, ²²ako kichorjikei inyende tamirmirie nyo tilil, mu kerkein nyobo cheptuge ako king'etune kut kipsengwet kile, inyende ku i werinyu nyo acheme abaibai kusop mu inyee. ²³kilekit jeiso kenysisiek sosom, kibere icheka ki weritab Josop, weritab Heli, ²⁴weritab Matat, weritab Lawi, weritab Melki, weritab Janai, weritab Josop, ²⁵Weritab Matatia, weritab Amos, weritab Naum, weritab Eli, weritab Nagai, ²⁶weritab Maat, weritab Matatia, weritab Semein, weritab Josop, weritab Joda, ²⁷weritab Joanan, weritab Resa, weritab Serubabel, weritab Saltiel, weritab Neri, ²⁸weritab Abdi, weritab Kosam, weritab Elmodam, weritab Er, ²⁹weritab Jose, weritab Eliesar, weritab Jorim, weritab Matat, weritab Lawi, ³⁰Simion, weritab Juda, weritab Josop, weritab Jonam, weritab Eliakim, ³¹weritab Melea, weritab Mena, weritab Daudi, weritab Jesii, weritab Obed, weritab Boas, weritab Salmon, weritab Nason, ³²weritab Aminadab, weritab Arni, weritab Hasron, weritab Peres, weritab Juda, ³³weritab Jakobo, weritab Isak, weritab Abraham, weritab Tera, weritab Tera, weritab Nahor, ³⁴weritab Seruk, weritab Reu, weritab Peleg, weritab Eber/weritab Sela. ³⁵weritab Kainan, weritab Arpaksad, weritab Sem, weritab Noa, weritab Lamek, ³⁶weritab Metusela, weritab Enock, weritab Jared, weritab Madaleel, weritab Kainan, ³⁷weritab Enos, weritab Seet, weritab Adam, weritab Jehovah.

4 ¹Ako kiweechkei Jeiso king'eete Jordan kunyitap Tomirmirie nyo tilil, ako kimut Tomirmirie kuwo surkwen. ²Aku kitebo betusiek artam kiyome oinde, aku ma am kiy mu betusiechoche, kirabas. ³Aku kiwolji oinde kile, "ne ii weritab Jehova ing'at koi kulegu makatia." ⁴Aku kiwolji Jeiso inyenda kileji, "kikisir kele, mosobe chii mu makatia kibaat." ⁵Ako kimit anyu oinde kulany, kuwo kuborji bororioshek togol cho bo ngweny mu ksarane. ⁶Kileji anyu oinde inyenda akoning kimnotoni togol, amu kikukono, aku akochini akatogol nyo amekyini. ⁷Netiloswo anyu, mu tainyu, kubinjining togol. ⁸Ako kiwolji Jeiso kileji, kikisir kele, ilosu Kiptaiyande Jehova nyong'ung, ak ioot inyende gei. ⁹Kiimit anyu inyenda Jerusalem, kuwo kutonone kipkeshebutab kaptisisie, ak kileji neti ii weritab Jehova isokorji ng'wenyumu yu, ¹⁰amu kikisir kele, iyooku malaikainakyi akubo inye si kuribing, ¹¹ak kutaaching mu eunekwak si motui koi keeldong'ung. ¹²Aku kiwolji Jeso kileji, "Kikimwa kele, Matityem Kiptaiyande Kamuktaindeng'ung'." ¹³Kinetar chesawilye katyemutye aka togol, kibakakta kinyenda akiwechigei. ¹⁴Kuwechgei anyu Jeso Galilaya mu kimnatetab Tamirmiry Nyotilil: aku kiit logoiywek korotinwek togolakibo kinyenda mu wolo legite woline. ¹⁵Aku kinetisyo mu kanisosyekwak aku kilosu biiko togol kinyenda. ¹⁶Kucho anyu Nazaret wolo kinarji, kuwo kanise mu betutab sabato, kile bani kicham kiweti, akitonon si kisoman, ¹⁷aku kikigoji kinyenda bukuinyi mamanat nyibo maotyo Isaiah. Aku kisyach bukui, kinyoru wolo kikisir kile, ¹⁸"Mi Tamirmiryetab Kiptaiyande kiboto' amu kiila si neityo aamchi kibananok logoiywek chokororonen: Kiyokwo si neityo aamchi che ratotin katyage, si neityo kimararta chepkorotinak, akatyach che kikinyalil, ¹⁹Si neityo aamta kenyi nyi chamat mu Kiptaiyande." ²⁰Akitugur bukui akugoji kiboityonde akitabjigei ng'wony. Kimisiy kinyenda biiko togol che kimi kanise. ²¹Aku tou kileji biichoche, "Kakusulda rani sirutyoni mu itiikwok." ²²Aku kibauryanji togol kinyenda akukwong'io mu ng'alek chibo kororonye chi kamong'une kotenyi: Aku kile kichega, "Ibere ma weritab Josep nyenyi?" ²³Kuwolji kichega kileji, Kisob, kisob amwowok kalewenoni, 'Isopgei inye chepkiricho!' Akomwoe ole, 'Aiy choche ako kichega mu koroni ng'ung' tuguuk togol chi kikegas kele kiayak mu Kapernaum.' ²⁴Akileji, "Amwowok kisob ale, 'Momi maotyondo nyi chamakse mu korenyi.' ²⁵aku amwowok ale, 'Kimi mosokikchatya Israel mu betusyek chekibo Elijah, bani kikakigar kipsengwet kenysisiek somok ako aroik lo, bani kikocho rubee nyo ou kore togol; ²⁶Akimakuykto Elija kuwo wolo mi aka togol mu kichega, kibate kiwo serepta mu koretat Sidon akoi kotat chepyoso aka nyikisiirto bondenyi. ²⁷Aku kimito chatya che kitinye mogondosai mu Israel mu betusyegp maotyo Elija; aku kimakusoop chi mu kichega kibate Naman

kityo Siryaninde.²⁸ Aku kinyiy nerega kichega togol mu kanise kinegas ng'alechwechu.²⁹ Akin'etyo akitorta kinyenda kimang'ta mu nganase, akumit kuwo tulwe barak wolo kitech nganaseng'wang' kimache sikitortae chemng'eisu.³⁰ Aku kisirtoe kwenung'wang akiwechigei woldo aka.³¹ Ak kichorjigei anyu Kapernaum nganase nyibo Galilaya. Akunet biik mu betutab sabato.³² Aku kikwong'io mu konetisyenyi amu kitinye kimnate ng'olyondenyei.³³ Aku kimi chi kanise nye kitinye tamirmiryetab oinde nyangaya, nyakiwaach mu wagee nyo ou,³⁴ kile, Bakaktech, kitinyegei nee ako kinye Jeso nyibo Nazaret? Kejonyee sineityo ibarech? Kanaing' akinye ale ii nyo Tilil nyibo Kamutainde.³⁵ Kigar kong' Jeso kinyenda akileji, "Siis, akimong'u mu kinyenda." Aku kinekakiwirchi oinde kwenung'wang' kimong'une kinyenda anyu kimatukwaita kiy.³⁶ Kukwong'io biichoche togol aking'ololjigei bungo kile, "Nee ng'olyondoni? Amu kang'at mu kimnate ako kamuktae tamirmiraik che yachen si kimong'u."³⁷ Aku kiit anyu logoiywek kamaswek togol chibo koronone akibo kinyenda.³⁸ Aku kimang'ta mu kanise akuwo kapSimion. Kimnyone kametap chepyosop Simion, aku kisaisai biiko Jeso akibo kinyenda.³⁹ Akitonon mu wolo legit akikar kong' mnondo; kibakakta kinyenda mnyondo, ak nyi mtyanit kutou kibaisyechi kichega.⁴⁰ Aku bani kilegit kung'urta asis, kumityi biiko togl biikwak che kimnyonsoot mu korotwo chatya: aku kigonor eunekji aa togol mu kichega akusoop.⁴¹ Kimong'une anyu oik biik chatya, kuwooch kibere, "Kinyende ku ii wertab Jehovah. Kigar kong' Jeso kichega machamji kutwogu amu kinget ichega kile, kinyenda ku Kristo.⁴² Akinemi bani kikiyech, kimong'u mu wolone kuwo suur kwen. Kiwasata tuyosyek kinyenda kiba wolo mi kimache kikarta kinyenda kiti mawo kibakakta kichega.⁴³ Aku kileji kichega, "Kamijo aamta logoiwek chokorornen chibo Laitornatetab Jehovah mu nganasok alak: amu kikiyokwo akibo nyone.⁴⁴ Aku kiamtata anyu mu kanisosiek chibo Galilaya.

5 ¹ Ak kind tukugiiche tube intense ak kigase ng'olyonde nyebo Jehova, Akitonon inyende mu tabandab araraitab Genesaret. ² Ak kiiri mengonik aeny cho bo beek kuyongsot mu taabandab araraitab, aku kikaku kuwalu remik kiba guun arokwak cho kiname kayaaik.³ Ak kilany tirbe (menge) aka nyo kibo simon kisom kile, kunikte katigin mu tabandab araraita. Ak kitebo ng'wong anyu aak kunet tuyosiek kimi tirbe (meli).⁴ Ak kine wany king'alole, kileji simion, Ti rany tirbe(meli) kuwo wolo chang beek aramisio.⁵ Ak kiwolu Simion kile, kiptanyandan kigubosio kemoi kimugul amo kinyoru kiy, agu arektoe anwe amu g'ol yendung.⁶ Ak kine kaguaii kile nyone, kinam kayakik cha chang kiti ng'etyo anakwak.⁷ Ak kigur bik cho kibosie togol cho kimi tirbe (meli) ak kile kibka kitorret; kibka anyu ak kinyiit tirbosiek yuwai, kiti tou tirbosiek (melisiek) kinyekisiotu.⁸ Ako kineero simion Petero, kubutyi kutung'okop jesu ak kile istoenogei amu ai chi nyee tengek ee kiptayandani.⁹ Amu kikwong ako togol cho kimito kiboto inyende akubo kayakik cho kika nam.¹⁰ Kikwong'o kira ambo Jacobo ako Johana werikab Zebedee, cho kibosie togolkiboto Simion. Ak kileji jesu Simion, ameyweisio king'ete (banienyi) iyegu nyo irame bik.¹¹ Ak kine kagurong'u tirbosiekwong (moingonikwong) kibka tabadab araraita, kibakakta togol ak kurub inyende.¹² Ak kine ti kimii nganasee aka, orokee, chito nyo ki nyiitat mogondasaik (kimwaok), ak kine ro inyende jesu, kubut kiiehta mo, ak kisaisai kile, kiptayandani, ngiticham imuche itililo.¹³ Ak kiyogoito jesu angu enyi, ak kitwai ak kile, kaacham, tililitu. Ak banone kibakakta (kisobcho) magondosaik(kimwok) inyenda.¹⁴ Ak king'at anyu kileji, ame mwochi ago ui iborjigei tisiinde ak igoito cho bo katilileng'ung, kile yo king'at musa kiyegu baornate mu icheka.¹⁵ Ak kitesang mising (kiiya) kiyesta kiserat lagoikiyi: ak kiyumkei kokwotinkek cha chang kibka si kukas ng'alekyi ak kisoob mu mionwokwak.¹⁶ Ako kitabangei inyende kityo kiwo sur ak kisa.¹⁷ Ako kiinetisio mu betu aka mu betusiecho che ak kimi pariaik ako kontik cho bo ng'atutik kitebisot mu wolone. cho king'ete nganase aka togol nyo bo Galili ako nyo bo Judea ako nyobo Jerusalem ak kimi kimnote nye bo kiptayande kiboto inyende kusoohe bik.¹⁸ Ako orogee kiskanu bik chito mu kitooku nyomeat borto, ak kiwas are nyo mute kuwo go, ak kumukonji inyende taitanyi.¹⁹ Ak kine matu unyoru wolo mute kuwo go amu kichang bik kilany kibirbir ak kurektoe inyende kitokunyi kuwer wolo ki kisheb akoi kwenu mu tai nyebo jesu.²⁰ Ak ki nero jesu kayaneng'wang, kileji, chichi, kakenyong kaat tengekwoiguk.²¹ Ak kitou sirik ako parisaik kubkat akubo ny'olyondonone kile, ng'o nyenyi mwae ng'alechu yaache? Ng'o nyo muche kinyoji chi kaat tengekwoik kibate Jehovah kityo?²² Ako ki nenai jesu anyu kapkotikuch kiwolji kileji, abkote nee mu muguleiywekwok? ²³ Nee nyo nyumnyum, ne kile kakinyong kaat tengekwoikuk, nda kele ng'eet ak iwedote.²⁴ Ako si kisich anai ole tinge kimnote weritab chi mu ngony kinyoji kaat bik tengekwoik, kileji chito nyo ki meat borto, Amwoung ale ng'eet ib kitoking'ung ak iwo kong'ung.²⁵ Ak king'eet anyu banone mu taingwong ak kuib kito nyo kishebe, ak kuwo kongi kulosunote Jehovah.²⁶ Ak kikwong'io icheka togol ak kulosu Jehovah ak kinyii icheka kaiyweisio, ak kile kagero rani tukur cho kikwong'e.²⁷ Ak kinesirto tukuchu kiwo kinyoru taakinde nyebo aisuru, nyo kiguure lawi kitebe mu wolo kitooge aisuru, ak kileji Rubka.²⁸ Ak kibakakta togol ak kurub inyende.²⁹ Ak kisetyi lawi inyenda tumto nyo ou mu konyi ak kimi tuye nyo ou nyebo taagikap oisuru ak bik alak cho kitebisot mu amisie kibito inyenda.³⁰ Ak king'ung'unyji pariaik ako sirikwak alamalyenyi, kile, kele nee so aamisio ak ayeeiso kiboto taagikab aisuru ak kiptengekiri?³¹ Ak kiwolji jesu kileji, mamage kiy chepkiricho bik cho chanagei, kibate cho mianatin.³² Kima cho aguur cho bo iman, ako kiptengekin si kisiku.³³ Ak kileji inyende; irukutegei kinyil cha chang alamalye nyebo Johana. ak kisaee, ak inye kile nyo ne ambo cho bo parisaik ako amisie choguk ak kiyeeise.³⁴ Ak kileji jesu icheka, Tos amuche agochi kurukutyi cho kakikuuji tumto kutu kumi sande kiboto icheka?³⁵ Ako bkooni betusiek cho mu tail keistoe icheka sande, kurugutkei anyu mu betusiechoche.³⁶ Ak kimwachi icheka anyu kaleweno kinyile kileji, momi chi nyo kerere yokwo nyo bo ngurio nyo leel ak kinapchi ngurio nyo yos amu ne eii kile nyone ki kerere nyone lell, ak kinyile kimanamageti yokwonde nyo leel ako nyo yoss.³⁷ Amo mi chi nyo ndeni divai cho leela chen sabok cho yosen ne eii kile nyone ku kerere divaik sabok ak kirandagei ak king'amagis sabok.³⁸ Akp ngoljini kende divaik cho leelacheen sabok cho leelachen.³⁹ Amo mi chi cho neka kiya divaik cho bo keny ku tu kumach cho leelachen amu mwoe kile kororon cho bo keny.

¹Ak kiwere baenikab bai mu betutab Sabato, ak kibatas alamalyenyi mesisekab bai, kibirir ak kinyiy. ²Ako kimwa walak cho bo Parisaik kile, amu nee saiy, mu bebutab Sabato nyo ma chamaat mu ngotutek? ³Ak kiwolji Jeiso kileji, tomo osoman agob ng'olyondoni, nyo kiay Daudi, yo kinerabas kiboto cho kimito ako inyenda. ⁴Ak kiwo kotab Jehova ak kunomu makatinakab cho bo kabartaa, kuam ak kubutuiji cho kimi kuboto inyenda ambo, cho chamtayay mu ng'atutik kuam chi kibate tisiik bungo. ⁵Ak kimwoji Icheka kileji, Weritab chi ki Kiptaiya nyobo Sabato. ⁶AK kiwo kaptisisie mu sabato aka, ak kunetisio, ak kimi chi wolone, nyo kimeeat eunyi nyo bo tai. ⁷Ak kiriib inyenda Sirik ako Parisaik kile, kuro ne mucho kusoob chi mu betub Sabato, si kinyoru aree nyo toomee. ⁸Ak kinai kobkotuutikwak, ak kileji chichone nyokiting'e eu nyo kimeaat, ng'eet tonon mu kwen. Ak king'eet kutonon. ⁹Ak kileji Jeiso icheka, ateebok, ole, tos yanaat mu ng'etutik keii nya karam mu sabato, nda keii nya ya? ¹⁰Ak kimun Jeiso bik togol, neityo kileji chichone, chuul eung'ung, ak kiay kile nyone, ak kisob eunyii kilee tai. ¹¹Ak kiiywenyo ak kitebekei kito nyoitooi Jeiso. ¹²Kiwo Jeiso betusichochi, tulwe kisa, ak kisa Jehova kemou kumugul. ¹³Ak kine yeech kukuur alamalaiki, ak kulewen mu choche taman ak aeny, ak kukuure kaineng'wang Cho Kiyoktoi. ¹⁴Simion, nyo kikukure kainenya aka Petero, ako Andrea wering'wang, ak Jakobo ako Johana, ak Pilipo ako Bartolomeo. ¹⁵Ak Matayo ako Thomas, ako Jakobo weritab Alphayo, ako Simion nyo kaine aka ku Selote. ¹⁶Judas weritab Jakobo, ako Judas Iskariot nyo ki ng'wektoinde. ¹⁷Ak kirokto kiboto icheka, ak kitonone yo ribrib kiboto tuiye nyo oou nyo bo alamalyenyi, ako bik cha chang cho kibkone Judea kumugul ak Jerusalem, ako tabandab araraita nyo bo turo ako Sidon, cho kibkoni si kikas inyenda, ak kesoob mu mionwekwak. ¹⁸Ak kisoob icheka cho kinyelile tomirmirik cha yaachen. ¹⁹Ak kiwas tuiye kumugul kutwai inyenda, ak kusoob icheka togol. ²⁰Ak kimararata alamalyenyi, ak kile, oboiboi akweka cho oi bonon, amu nyong'wong bounote nyo bo Jehova. ²¹O boiboi akwe cho arobosot banienyi amu mitai ororsot. ²²O boiboi akwe, yo ng'omok bik, ak kubesiok, ak kuchorok, ak kiwirti kaineng'wong, kile ya akubo weritab chi. ²³O boiboitu mu betunone, ak osokoryo mu boiboitu, amu orogee, o konuneng'wong mu Kipsengwet, kiichi obotinekwo maotik kile nyoone. ²⁴Ako bwa akwe cho oii mogore amu kaatach kakaikaeng'wong. ²⁵Bwo akwe, cho abiyong'otin rani, amu tai arobosot, Bwo akwe cho arorsot rani, amu mu tai oteisot ak orirsot. ²⁶Bwo akwe, yo omwoe bik togol cho kororon akubo akwe, amu kikuo chi kile nyone, abotinakwak maotik cho bo lambach. ²⁷Ako amwuwok akwe cho agase, acham bunikwok o ichi cho kororon icheka cho ng'omok. ²⁸aberur icheka cho bonok, ak asochi icheka cho usok. ²⁹Ak inyenda nyo roboching tokilikilie aka, ikochi tokilikilie nyi aka, ak inyenda nyo serening ngurieng'ung ku metae akob sumbeng'ung. ³⁰Gochi chi aka togol nyo soming, ak inyenda nyo serening tuguguk ku matiticham kuweekung kinyile. ³¹Ak kile yo ameche kuiywak bik, aichini akob akwe kilee nyonee. ³²Ngutacham anyuu icheka ho chomok, atinye kongoi nee, amu akob kiptengekin ku oiye kile nyonee. ³³Aku netoichi ch koromen biik cho iywok cho koromen, onyorjini nee? ³⁴Ak nobesench biik cho oyone ole mu tai onyorjini, oting'e kongoi nee?, amu akob kiptengekin kubsenchini kiptengekinak alak si kunyuru cho teno chakiche. ³⁵Ako acham bunikwok ak aiy nya kararan, ak obesento, amakany onyuru kinyil aka, si kiyetu ko nuneng'wong ak oyeku werikab inyenda nyo toror mising amu talaai inyenda mu icheka cho meting'e kongoi ako cha yaachen. ³⁶Ologuu cho ting'e rirgei kilee kwandang'wong nyo ting'e rirgei. ³⁷Amoruokyi, si ma makiruokwok mu tai, amokikiyi si ma kikikiyok mu tai, atiach si ketiachak mu tai. ³⁸Okoito, si kekonok mu tai, kerutie nya kararan nyo kikukor nyo kikisasach kuturarai, choche cho mu tai kukochini biik, teketikwak, amu kerutie nyo okere ku nyonee nyo kikerunenok akob akwe mu tai. ³⁹Ak kimwochi koleweno kileji, muuche kipkorotio kundoichi kipkorotio aka? ⁴⁰Mesire alamalye konetindenya, ako inyenda nyo kikunetaak kikerkeitu ako konetindenya. ⁴¹Ak amu nee siroti kiy nyo mi kondab tupcheng'ung, aku menone kito nyo mi kondang'unginyende? ⁴²nda imuktoi ano ileji wering'wong, tupchenyu kany onemung kiy nyo mi kondang'ung amebkote kito nyo mi kondong'ung inyende? Ee, Kiplasgeiyandani, nomu korook kito nyomi kong'tang'ung' sinemararta ikaram imuch anyu inomu kiy nyimi kong'tab wering'wong'. ⁴³Amu momii keet nya kararan nyo yiee beekyi cha yachen, amomii keti nya yah nyo yiee beekyi cho kororon. ⁴⁴Amu kineye keti aka togol beekyi, amu mobute bik beekab mogoi mu kotooi, ak mobute biik beekab sabibu mu kotooi. ⁴⁵Nomuu chito nya kararan kito nya kararan kito nya kararan king'eete konorue nya kararan nyo mi muguleldonyi, aku nomu chito nya ya kito nyo mi muguleldonyi, amu cho mwoe kutinyi ku cho nyiitat muguleito. ⁴⁶Amu nee so kureno Kiptaiya, Kiptaiya, amo iye tuguk cho amwoe? ⁴⁷Chi aka togol nyo chonjino, ak kugas ng'alekyu ak kuai aborwok chi nya karkei. ⁴⁸Karkei inyenda ako chi nyo teeche ko nyo kibal kuwo ng'weny missing, ak kukochi lumeiwonde koito ak kine chang'it beek kurus kutia koyone, ama much kutitim amu kika kiteech kikaram. ⁴⁹Ako inyenda nyo kese, amaiye, ku karkei ako chito nyo kiteech kot nyingwinyek ama lumdangweny lumeiwonde, ak kurus beekab kutia, ak kilul banone, aku kietu luletab koyonee.

⁷ ¹Ak kine kakumwoji ng'alekyi togol itikab biik, kuwo KAAPARNAUM. ²Kimi Kiptaiyande nyobo bogol, nyo kiting'e kiboitionde nyo kicheme kot, aku kimione kiboitiondonone nyo kilegit kima. ³Ak kine kass akubo Jeiso, kuyokto inyenda boishakab Yahudik, kiba kumwochi kucho kusoob kuboitiondenya. ⁴Ak kine iit icheka wolo mii Jeiso, kisaisai inyenda missing, kileji, nyoljini inyenda ioychi kile nyone. ⁵amu cheme bororienyo, ak kiteekwech kapkorosuno. ⁶Kiwo anyu Jeiso kuboto icheka. Ak kine ma kulou mu koyone, kuyokto kiptaiyandanone choronokyi kuba wolo mi inyenda ak kileji, Kiptaiyandani, matitiimkei amu anee kumooi chito nyo yemegei icho konyuu. ⁷Kile nyone, akob ane ku mi iitekei ole acho wolo imi, mwa ng'olyo kibat ak kusob kuboitiondenya. ⁸Akob ane, ambo ndo i chi nyo kuboiywo, ating'e asikarik cho aboyuu, aku noleji nyi ui, kuwo, ak noleji aka, choo, kucho, ako noleji kiboindeyuu aiy nyi, kuai. ⁹Ak kine kass Jeiso ng'alechwechu, kukwong akubo inyenda, ak kileji tuiye nyo kirube inyenda, amwuwok ole tomo anyoru kayana nyo ou nyo teno nyi, acha akob mu Israel. ¹⁰Ak kine weektakei anyu cho kika kuyokto kuba kaa, kinyoru kuboitiondonone ku

kikusob.¹¹ Ak kine kakusirto betunone, kuwo kaptisisie nyo kikikure Nain, ak kiba alamalyenyi kiboto inyenda, ako tuiye nyo ou.¹² Ak kine rikta kirketab kaptisisie, orogee, kikisute musto, nyo ki werii nyo kisich kame kityo, ak ki mosok chepyosonone, ak kimi kiboto inyenda bii chachang cho bo kaptisisie.¹³ Ak kine ro kiptaiyande inyenda, kirire, ak kilji, mati tirir.¹⁴ Ak kirikta yo lekite ak kitwai kito nyo kikimumile ak kitionio anyu cho kimumile. Ak kileji Jeisoinyenda, Narananikomwoung ole, ng'eet.¹⁵ Ak king'eet anyu nyo kika kima, ak kitou kung'alal. Ak kikoji iyonyi.¹⁶ Ak kicholyo togol, ak kulosu Jehova, kile kakung'eet mu kwenunyo orkoio nyo ou ak kakurutoji Jehova bikyi.¹⁷ Ak kiyomu ng'olyondonone akubo inyenda Judea kumugul, ak korotinwek togol cho kilekite wolone.¹⁸ Ak kimwochi alamalyetab Johana inyenda tukuchwechu togol.¹⁹ Ak kiguur Johana biik chobo alamalyenyi aeny ak kuyokto kuba wolo mi kiptaiyande, kiteebe kile, tos inyende nyo chonii, nda kikany aka?²⁰ Ak kine iit biik wolo mi inyenda, kileji koyokwech Johana kobotiseninde kebka wolo imii kile, tos inyende nyo ichonii, nda kikany aka?²¹ Mu banone kusoob chachang cho kimionsot mu mionwok ako tomirmirei cha yacheen ak kukochi kubkorotoi cha chang kumararta.²² Kiwelji kileji, aba, amwochi Johana tukuk cho koroo ako cho kakass, kokochi kipkorotin kumararta ak kubetata cho kong'wolsot, ketilil cho keting'e mokondosai, ak kukasta cho koming'iotin, ak keng'eet cho ki kikobok, keomjini kibananoi ng'alek cho kororon.²⁴ Ak kind kakiba cho kiyoktoi Johana, kitou kimwochi tuiyosiek akubo Johana, mile, kiong'etito surkwen aroo nee? ²⁵ ako ki naba sang arakwe nee? chito nyo kilooche ngureik cho tongusen? Akas anyu, ichekacho looche ngureik bo leles, ak cho meng'isie mu telbis, kumito korikab laitorin.²⁶ Ako ki naba sang arakwe nee? Maotio, ee, amwowok ole sire maotionde.²⁷ Nyenyi nyo kikisir akubo inyenda, kele orogee, ayoktoi kuboitiondenyu kundoening mu bounote nyobo Jehova ku ou kisir inyenda.²⁸ Amwowok ole, mu cho ksich chepyosoi ku momi nyo ou nyo sire Johana, kubate inyenda nyo mining mu kabatisanab Johana.²⁹ Aku kine gas biik togol, Kuboto tokikab aisuru, kuiityi imanda Jehovah, amu kika kabatisan mu kabatisanetab Johana.³⁰ Aku kitai Parisaik ako ng'omotikab ng'otutik, kiruokutikab Jehovah, mo mokyigei kicheka, amu kima batisan kinyenda icheka.³¹ Aku kile kiptaiyande, omuustoi nee bikab abeni aku kargei ako nee? ³² Kargei ako logoi cho tebisot wolo kioltoisie, ak kukurekei, kibere, kikekutwak kururusiek, aki mo tiensot, kikirirjok aku moririo.³³ Amu kicho Johana kobotisoninde, aki ma am makatia nde ki divai, akamwoiyakwe anyu ole, ting'e oinde.³⁴ Kicho weritab chi kuomisyo ak kuyeiso, ak amwoe ale, orogee, chemoetio chichi, ak yeiin divai, choruetab tokikab aisuruu ako kiptengekin.³⁵ Aku nayat ng'omnote kele bo iman mu lagokji togol.³⁶ Aku kimach aka mu Parisaik kile keomisyo ako kinyenda. Aku kiwo kotab Parisointenone ak kutebo ng'weny kuomisyo.³⁷ Ak orogee, chepyose aka nyo kimito nganase, nyo ki kiptengekyo, kine nai kile, tebe ng'weny Jeiso kuomisyo mu kotab Parisointenone, kuib chubo, nyo kimito mwai nyo ng'utoi nya anyiny.³⁸ Ak kutonon mu let wolo legite kelyeki, kirire, ak kutou kutokyi lokik kelyekyi, ak kimilekei kelyekyi ak kuile mwayionee.³⁹ Ak ki nero nyone Parisoindenone kukure inyenda, kimwa mu arinyi, kile, nda ko orkoio chichi nda kikinai kile ng'o chepyosoni katwai inyenda, ak nyole nee, kile kiptengekyo.⁴⁰ Ak kiwelji Jeiso inyenda kileji, Simion ating'e ng'olyo nyo amechi amwoung. Ak kile konetindoni, mwa anyu.⁴¹ Kile kimii besendoindo anum nyo kiting'e beseniky aeny, kibesen aka denrisiek bogol muut ak kibesen aka konom.⁴² Ak kinemakiting'e kiy nyo yoktoe, kinyoji kaat ichika tuwai. Ng'o anyu mu ichika tuwai nyo cheme inyenda inyenda kisir? ⁴³ Kiwolu Simion kile, abere inyenda nyo kikinyoji kaat cha chang. Ak kileji kairuoch kikaram.⁴⁴ Ak kisekyigei chepyose, ak kileji Simion, iroti chepyooni? kaacho kong'ung ame kono bei ounee kelyekyu, ako kokitokyi logikab chepyosoni kelyekyu ak kubuuke sumeekyi.⁴⁵ Me ng'ututa, aku inyenda, king'eta acho kutomo kimeto kung'utute kelyekyu.⁴⁶ Meile metinyu mwai, ako kakuile chepyosoni kelyekyu mwaita nyo nyomdut.⁴⁷ Kile nyone, amwoung anyu ale, kakenyaji kaat tengekwokikyi cho ka chang, amu cheme missing, ako inyenda nyo kinyojini kaat katikin kicheme ambo katikin.⁴⁸ Kileji chepyosonone, kakenyounge kaat tengekwogikuk.⁴⁹ Ak kitou ichika cho kimi kuomisie kuboto inyenda, kumwa mu ariting'wang kile ng'o nyi kitenyoini biik tengekwokikwak? ⁵⁰ Ak kileji chepyose, kakisorung kayaneng'ung, ui mu kalya.

8 ¹ Kinebata nyone, nyi matyanitn kimanata nganasok cho echen ako cho mungechenkwomdote ak kimwoitote logoichokororneen chebo baunate nyibo Jehovah, aku kimi tamanu ak aeny kiboto kinyenda. ² Ako chepyosok alak che kikakusoob mu tamirmiraik chayachen ako myonwogik: Maria nyikikugure Magdalena, nyikimong'une oik tisabu. ³ Ako Joanna, chepyosop Kuza, kiboityondop Herod, ako Susana, Ako chepyosok alak cha chaang' chekoisyeyini kinyenda mu tugukwaak.⁴ Ako kineyumgei tuye nyo ou, akupkonji kinyena biiko kung'ete nganase aka togol, kumwoji kichega kalewono kile; ⁵ Kiwo kolindo kuisto kasuyekyi, aku kinemi bani tukiistoi, kichinji alak aree taban, aku kikitayarata akwaam taritek chebo barak. ⁶ kichinji alak yatya, aku kinebiityo, kuyomnyo amu manyoru beei. Aku kichinji alak katoi kween, aku kibiityo katok kiboto kasuyechoche aku kikititir. ⁸ Aku kichinji alak nyung'winyek chokororneen aku kibiityo aku kiya aka togol bogol. Ak kine tikimi kimwoe tuguchu, kimwa mu kote nyo ou kile, " Nyo tinye iit nyogostoe kigasta. ⁹ Kiteebe alamalyenyi wolo taptoi kalewenonienyi. aku kile, " kigonok akwee anai ung'otoik chebo baunatatetab Jehovah, ako kimwachini alak mu kalewonoik, si nemararta, kimorooti kiy, si ne kase, kimanaye. ¹¹ Onyi wolo mwotito anyu kalewenoni; kasuyek ku ngolyondob Jehovah. ¹² aku chochee mi aree taban ko kichega che kikugas, neityo kucho chesawil kunomu ng'olyonde mu muguleiywekwak si manyoru kuyan ak kesoru. ¹³ Aku kichega chimi yatya barak, ku kichega chi negas ng'olyonde kuyan mu boiboioy akumatinye tigiit, yane aku nyimatyana, kuchuchujgei mu betu nyibo yoomso. ¹⁴ Aku kasuyek che kichinji wolo mi katoi, ku kichega che kikigas aki nemi bani kikiba, kitiitir kereretab met ak mogornondi, ak boiboioy nyibo tugukab sabe, akimoiyo beek cho nyitotin. ¹⁵ Aku kasuyek chi kichinji nying'winyek chokororneen, ku kichega che nekakugas ng'olyonde, kinam kikaram mu muguleiwek cho toloen aku kararan ako kiiyo beek mu kagiletabgei. ¹⁶ⁿ Momi chi nyi ne kakunam tait kituge kiy, nde kugoji kurerop kitok, kigojini kiy nyi tonone tait, si

neityo kisich kuro lapkeyo biko togol chipkonigo.¹⁷ Amu momi kiy nyikiwinye nyi ma tuun tooku, aki momi kiy nyi bo ung'ot nyi ma tuun nayeke mu wolo lapkei.¹⁸ Ara, agaste anyu kikaram, amu aka togol nyi tinye ku tuun kegojini, aku nyi ma tinye, ku tuun kesare agob nyemoe kile atinye.¹⁹ Kipka anyu ambo iyonyi ako chotupcho aku kimamuch kirikiy amu kichaang' biiko.²⁰ aku kikimwoji keleji, " mi kuyonye iyong'ung' ako tupchosyegk mu sang', mache kunyorung'." ²¹Kiwolji Jeso kile, " iyonyu ako tupchosyeyku ku kichega che gase ng'olyondetab Jehovah aku ai.²² Aku kilaany moingetab peek betu aka mu betusyechoche, kiboto alamalyenyi, akuleji "Ngelandae araraita keba tngeni." Kutou anyu kiba.²³ Aku kinemi bani tikibeti, kuru Jeso kunuuch. Kicho anyu usone nyo ou araraita kitimache kinyiy beeko moinge kiticholyo.²⁴ Kipka anyu alamalye wolo mi kinyenda akung'eet kile, ' Konetindoni! Konetindoni! kikimach kemeiyo!" kinget anyu akigar kong' usone ako wasetabkei nyibo beek: kisiis anyu araraita kumny.²⁵ Akileji kichega, "mi ano kayaneng'wong'?" kuyweisyo aku kwong'yo, kilejigei kichega, "Ngoo chichi anyu nyi ng'ate usene ako bei kitigas iit kinyenda."²⁶ Kiit anyu koretat Gerasenik, nyitakyinigei Galili.²⁷ Ako kinecho tabandab araraita, kutuyo kinyenda ako chiito aka nyikichone nganase nyikitinye oi aku kimakuloje nguroi mu betusye chatya aku kimamenye go ako kitebee kererisyek.²⁸ Aku kinemi bani kiro Jeso, kuwaach akibutyi taitanyi, akimwa mu kotee nyo ou kile, " Ating'ening' nee, weritab Jehovah Nyotoror kisob? Asoming' ole kitimenyalila.²⁹ Amu king'at tamirmiryey nyangaya kimong'u mu chichone. Amu kikakinam betusyek chatya aku kikiribe kinyenda kisob aku kikakirate sirimwei ako mugurek, aku king'atyine tuguk che kikirate, aku kione oinde kinyenda kuwo suur kween.³⁰ Kiteeb Jeso kile, " Kurening' ng'oo? Kuwolu kile, "Chatyaa" Amu kikakuchut kinyenda chesawilok chatyaa.³¹ Kitastai kisom kinyenda kitimang'at kichega kiba kebene nyimatinye wolo bokyini.³² Aku kimi wolone acheik chatya chibo torook che kiagetsoot mu tulwe taban, aku kisoom anyu oik kisob kile, kechamji kuchut toroochoche, aku kikichamji.³³ Aku kimong'u anyu oik mu chichone, akiba kuchut torook, aku kirwoi acheikab torook kung'urta chepsururto akoi araraita oriit akoi kubok.³⁴ Aku kineru che kiyagishe tuguk cho kiiyakis, kurwai akiba kimwaita mu nganase ako mu kooore akubo nyone.³⁵ aku kiba kuroo kito nyikiayak, aku kipka wolo mi Jeso, kunyoru chiichone nyi kimong'une oik, kitebe mu kelyeb Jeso, kilaagat aku kitinye ng'omnatenyi; aku kiywoisyo.³⁶ Aku kimwoji kichega chokiroti tuguk che kiiyegis, wolo kikisopto chichone kitinye oik.³⁷ Ako kisom anyu biiko togol chibo wolo legite koretat Gerasik Jeso kuwektagei kibakakta kichega amu kikakuyweisyo kisob. Aku kilaany moingetab beek aku wektagei.³⁸ Kisoom anyu chikai kimong'une oik kile kiba tuwai, aku kileji Jeso,³⁹ Wechigei kong'ung' akimwaita tuguk cho echen chikyaung' Jehovah." Ako kiwo anyu kimwaitata mu nganase kimugultuguk choeche chekyoiji Jeso.⁴⁰ Ako kinewektagei Jeso, kitaach tuye amu kikanye biiko togl kinyenda.⁴¹ Aku aroo nyu, kicho chitaga nyi kugure Jairo, ki bauninde nyibo kaptisisyo, ako kibutyi keyekab Jeso akusoom kinyenda kile kcho konyi⁴² amu kitinye cheptanyi nyi kinyenda kityo, nyibo kenysisiek nyi bo wolo bo taman ak aeny, nyimi kimeyote. Ako nele bani weti, ko kikichakis tuye kumut kinyenda.⁴³ Aku kimito chepyose ako nyikibeti kereti kenysisiek taman ak aeny, nyi kikakibaisye tuguuki togol mu chepkerichinek, aku kimamuch kinyenda kusoob mu kichega togol.⁴⁴ kucho anyu kuweeru let nyibo Jeso, akutiiny ngurienyi taban, aku banone kisisyo keretik makibeti.⁴⁵ Aku kile Jso, " Ng'oo nyi katinyo? kinetiyo togol, kile Petero ako cho kimi kiboto kinyenda, konetindoni, kariching tuye aku kikiching.⁴⁶ Aku kile Jeso, " Kakutinyo chii ; amu kanai ale kakimandaena kimnate.⁴⁷ Bani kineru chepyose kile momuche kuwinygei, kucho kibotononu akubutyi ng'wony mu tainyi, akimwaita mu taitab biiko togol kiyo kigoji kutiiny kinyenda ako wolo kisoopta banone.⁴⁸ Aku kileji, " Chebi, kakusooing kayaneng'ung'. Uu mu kalya.⁴⁹ Ako kineti king'olole, kucho chii nyiking'ete korop baunindetab kapkoros, kile, " Kakima cheptang'ung' matitiyim konetinde." ⁵⁰ Ako kinegas Jeso, kuwolji jairo, "Iroo meiywoisyo, iyan kibaat si kesoop."⁵¹ bani kineit got, kimatikichamji chii aka togol kuwo go kibate kinyenda, ako Petero, ako Juhana, ako Jakobo, ako abootab chebone kiboto iyonyi.⁵² Kiriirsoot anyu biko togol akubo kinyenda, ako kileji, " Moriirsoot, au ma ma' kinyenda aku koru kibat." ⁵³ Aku kitou kurorji kinyenda akuseng'eny, amu kinget kile kikakima.⁵⁴ Kinam eutab chebone akiguur kile, " Chebi, ng'eet." ⁵⁵ Kikotugei anyu tamirmiryenyi, aking'eet banone. King'at kile kegoji kiy nyikwome.⁵⁶ Kukwong'io kisob sikikiy, aku king'at kichega kitimomwoji chii kiyo kyayak.

9 ¹ Kiguur any taman ak aeny kiyumgei akigoji kimnate ako baunate kuboyu oik togol akusoop cho mnyonsoot.² Akuyokto kwamta laitornatetab Jehovah, akusoop cho mnyonsoot.³ Kileji, " Kitimoib kiy mu bandng'wong', ambo kirokwo, nde lol, nde makatia, nde fedhaisyek, akitimoib simbotik aeny.⁴ Aku got aka togol nyi among'jini, atebi wolone agoi aba.⁵ Aku chii aka togol nyi motochok, ngamanda, mu nganasanone, alalakta teritek mu kelyekwok sineityo kuloku baornate mu kichega." ⁶ Kiba anyu kibinoto nganasok kwomtoi logoi chokororneen akusobote biik mu woldo aka togol.⁷ Kigas anyu kirwoginde Herod tuguuk togol che kyoyogis; kiimgei kisob amu kimwoe alak kile kiking'eet Juhana mu chikikubok.⁸ Kibere alak kikitogu Elija: kibere alak kiking'eet aka mu maotik chi kibo keny.⁹ Aku kile Herod, " Kyatil metitab Juhana, aku ng'oo anyu chiichi agase tuguuk chou chu akubo kinyenda?" ako kiwas kile sa roo kinyenda.¹⁰ Kinemi bani kikugotugei kayaktoik, kimwoji kichega tuguk chi ki ai. Kimit kichega kiba taban bungo akoi nganase nyikikure Bethsaida.¹¹ Aku kinenai tuyosyek, kirup kichega. Kitaach kichega aking'ololji akibo laitornatetab Jehovah, akusoop kichega chi kimache kisopcho.¹² Kinemi bani mache kiimen, kipka anyu tamanu ako aeny akileji kinyenda, " Lechii tuye kibejigei sikiit nganase ako kooore, sikinyoru wolo rusoot, ako amitwigik." Amu kimi kichega suur kween.¹³ Kileji kichega, " Ogoji akwega amitwogik." Kile, "Makitinye kiy kibate makatinak mut ako samakinak aeny; kibate keba kealji amitwogik biichu togol.¹⁴ Amu kibo wolo bo murenik Elipusyek muut, kileji kasubikiy, acheb kitabi ng'wony aku akany kibeate konom konom.¹⁵ Akukiai anyu kile nyone, aku chep togol kitabi ng'wony.¹⁶ Aku kinam makatinakai muut ako samakinak aeny akimarar barak akuberur, akibutitil; akigoji kasubikiy sineityo kugji kabureito.¹⁷ Kiomisho anyu agoi kibiyongcho;

agoi keyum katukanik chiking'otu, kiloku kerebotinwek taman ak aeny.¹⁸ Kinemi bani soe kityo, ki kimi kasubiky kiboto kinyenda. kitebe kichega kile, " Mwoe tuyosyek kile aine ng'oo?"¹⁹ Kuwolji kile, " Juhana kabotisaninde. Kibere alak Elija, kibere alak kiking'eet maotionde aka mu chiki bo kenye."²⁰ Kileji kichega, " Ang' akwee abere akwe aine ng'oo?" kuwolu petero kile, " Ii Kristo nyibo Jehovah."²¹ Aku kitigon kichega, aki ng'at kileji matimwoji chii ng'olyondonienyi.²² kile, " Kikiyam weritab chii kinyalil mu tuguk chatyang', akitai boisyek kinyenda ako tisiik cho echen ako siriik, akebar, akung'eet mu betutab somok."²³ Kimwoji togol kileji, " Ngimache chii aka togol kirupkaa, kikany kitaigei kinyenda akiip kimurtoyondenyei betu aka togol akirupkaa."²⁴ Chii togol nyimche kusoru sabondanyi, kuboote; aku chii togol nyuboote sabondanyi akubo anee, kinyone nyi soruu."²⁵ amu nyoru keljin nee chii nenyoru ng'wony kimugul akubetgei, nde kesare sabondanyi?²⁶ Amu chii aka togol nyi ililonjino ako ng'alekyu, ku tuun ililonjine kinyenda weritab chii chichone bani tuun choni mu torornatenyi, ako nyibo Aboo ako nyibo malaikaisyak chotililen.²⁷ Akamwowok nyibo kisob ale, mito alak mu chotononsoot mu yu chi matuun kichamcham kimeiywa matiny, agoi kuuro laitrnatetab Jehovah."²⁸ Akinemi bani kikubok betusyek chile wolo bo sisit, king'ete bani kimwa ng'alechoche, kimit Petero ako Juhana ako Jakobo, kulang'ta tulwee kiba kisai.²⁹ kinemi bani kitikisoe, kuwalak itondo nyibo togenyi, akilelagitu nguroiky kiti talil biich.³⁰ Aroo anyu, king'ololyo biiko aenyu kiboto kinyenda,. K i Musa ako Elija;³¹ chikitogu mu talilindo, aking'ololsoot akubo meenyi nyikimache kusulda mu Jerusalem.³² Ako kinukyo ambo Petero, kiboto kichega chikimi kiboto kinyenda, akinemi bani kikosu, kuuro talilyenyi, ako bichoche aeny chi kitononsoot kiboto kinyenda.³³ Kinemi bani mache kubesyo ako kinyenda, kileji Petero, " Kanetindoni, kakararanit amu kakimii yweyu; siketeach koryosyek somok, nyong'ung' aka, kibo Musa aka, kibo aka Elijah." (Kimwoe kimonget kito nyi mwoe).³⁴ Bani kitikimwoe ng'alechoche, kicho bolde, akituch kichega; akuywoisyo bani kichut bolde.³⁵ Kicho ng'alala, mu boldee akile, " Nyi werinyu nyikikalewen; agas iit kinyenda."³⁶ Kinebata ng'alalanone, kutoku Jeso kityo. Kisiisyo anyu akima mwoji chii mu batusyochoche kiy aka togol akibo kiy nyikiro.³⁷ Aku beetu nyikirupe betunone, bani kurogu mu tulwee, kutuyo ako tuye nya oo.³⁸ Aroo anyu, kibol chito aka mu tuye kile, " Konetindoni, asoing' ale riree werinyu amu nyenyi kibat nyi kikisich. Roo soo, name tamirmirye kinyenda aku nyimatyana, kuwaach akibirobirtogei kitipkane bugaa kotenye. Akunyaliil kisob akimachame kimanda.⁴⁰ Aku kiorirji kasubikuk aleji kuoon akikimamach."⁴¹ Kuwolji Jeso kileji, Ee, abeni matinye kayana akukwong'ot. Atabee kibotok akomuitoi akibo akwee agoi ayu? Mutu wering'ung kucho yu."⁴² Kinetikichoni, kiwirji ng'wony oinde kinyenda akibirobirtoto kisob. Kigar kog' Jeso tamirmirye nya ngaya, aku soop lakwee, akugoji abonyi.⁴³ Akonkikwong'io togol akubo ooindo nyibo Jehovah. Akinemi bani kutukukwong'soot akubo tuguk chi kyai Jeso, kileji kasubiky;⁴⁴ "Nguchut ng'alechu itikwok amu tuun kugoitoi weritab chii kuwo eunekab biiko."⁴⁵ Akimanai kichega mwayanone; kiunyak mu kichega si manai. kuywai kitebe kinyenda akibo mwayanone.⁴⁶ Kutou kitebgei kile, "Ng'oo nyoloku nyokiindo mu ahee?"⁴⁷ Kinenai Jeso kapkotutikab muguleikwak, kinam lakwa katigin akugoji wolo legite kinyenda. v 48 kileji kichega, " Chii aka togol nyitooche lakwani katigin mu kainenyu, kutochoo, aku chii aka togol nyitoochoo, kutoche kinyenda nyikiyokwo. Amu kinyenda nyile katigin mu akwee kuloku nyokindo.⁴⁹ Kuwolji Juhana kileji, "Kiptayandani, kakiroo chii kuone oik mu kaineng'ung' aku kakitae amu makibetote togol."⁵⁰ Kileji Jeso, Kitimatae, kinyenda nyi makartook ku nyong'wong'⁵¹ Aku kikakilegitit kisob kiitita betusyek nyikitoche kinyenda mu barak, kielgei kutokyi togenyi Jerusalem.⁵² Kuyokta chiiibe ng'alek kundoe kinyenda, kiba anyu kumongji kokwetab Samarik si kichapchi kiy aka togol.⁵³ Aku mataach kinyenda amu kikakitakyi togenyi kuwo Jerusalem⁵⁴ Aku Kineru kasubiky Jakobo ako Juhana, kileji, " Kiptayande, ara imache keng'at maat kicho mu kipsengwet, sikiwany kichega?" (Kile bani kioye Elija).⁵⁵ Kiwekjigei kichega akigar kong'.⁵⁶ Kiba anyu kokwee aka.⁵⁷ Aku kinemi bani kitikibeti mu aree, kileji chito aka, " Arupung mu wolo togol nyi iweti."⁵⁸ Kileji Jeso kinyenda, " Tinye cheptibin kabonotikwak, akitinye taritek chebo bara keswen, akimatinye Weritab chii wolo konoree metinyi.⁵⁹ Kileji aka, "Rupkaa." Aku kileji chichone, "Kiptayat, chamng'oo kirok awo atub abonyu."⁶⁰ Kileji, "Bakakte chi boku kutup chakwak chi boku; akiwo kinyende ng'alekab laitornatetab Jehovah.⁶¹ Kile aka kinyile, " Tuun arupung' kiptaiyat, ako chamwo kirok awo aleji bikab gonyu saisere.⁶² Ako kileji Jeso kinyenda, " Momi chii nyiname mogombetab einak aku kus kong' nenyoljine laitornatetab Jehovah.

10¹ Kinesirto tuguchu, kilewen Kiptaiyande alak tamanwogik tisab, akuyokto kibae aeny kundoe kinyenda kiba kokwe ka togol, ako kamasta aka togol wolo tuun were kinyenda.² Kileji kichega, "Ou kasisie aku kongering' kasik, nyone anyu, asom kiptaiyande nyibo sikumuch kuyokji kasik kasisyenyi.³ Abe ortinwekwok, aroo, kayoktok kile wareb kechir mu kwenutab sui.⁴ Kitimoib loletab chepkondoi, nde lengu, nde kweron, aku kitimatoch chi mu are.⁵ Got aka togol nyochute, amwa kirok ole, 'Ngitebi kalye mu goi!' ⁶ Aku ngimi weritb kalye yone, kitabe kalyeng'wong' mu kinyenda, aku ngitimomi, kuwekjogei akwega.⁷ Atebi goyone, aku kiy aka togol nyogonok, aam akoyeisy, amu michini kiboitio melektanyi. Kitimabetata king'ete got aka akoi got aka.⁸ Kokwe aka togol nyi kochut, akitachak, aam kiy aka togol nyi kakugonok.⁹ Akasobon chi mnyonsoot mu wolone. Akoleji kichega, 'Kakirikchok baunatetab Jehovah.'¹⁰ Aku kokwe aka togol nyo ochute, akimatachak, aba ortinwekji akole,¹¹ 'Kakipukjok ambo teritekab kokweng'wong', chi kanam kelyekjo, aku anai kile: kikilegitit baunatetab Jehovah.'¹² Aku amwowok kile, tuun kaigaitu sodom mu betunone kisiir kokwonone.¹³ Pwo kinye Chorasini! Pwo kinye Betsaida! Amu nde kikwai mu Tiro ako Sidon boisionik chebo kwong'e, kile bani kikwai mu akwe, nde kika kusugu kenye kuloche kuniyos akitabisot kap aroon.¹⁴ aku tuun kaigaitu mu Tiro ako sidon mu kirwoge kusirok.¹⁵ Ako kinye Kapernaum, muche ketororing' iwe kipsengwet? Olo, kuwurchining' ng'wony akoi woldap chekikimeiyi.¹⁶ Kinyenda nyigasok, kugoso ambo anenda, aku kinyenda nyitayok ki kataya ambo anenda, aku kinyenda nyi tayo, ku taye ambo kinyenda nyikayokwo"¹⁷ Kiwechgei bichoche tamanwogik tisob ak aeny mu boiboioy akile,

"Kiptaiyande, akob chesawilok ku kakasech iit mu kaineng'ung' " ¹⁸ kileji Jesu kichega, " Komi arotii chesawil kuwolu mu kipsengwet kile karyala. ¹⁹ Aroo, kagonok kimnon samuch atyar erenok ako tokoloi, akamukta kimnote togol nyibo bunyonde aku momi kiy nyomuche king'omok. ²⁰ Aki kitimobabaitu mu ng'olyondoni, amu gasok iit oik, aku abaiabaitu amu sirotin kainaikwok mu kipsengwet. ²¹ Mu banone ku kibaibait Jeso mu Tamirmirye nyotilil, akile, " Awekung' kongoi kinye Aboo, kiptaiyande nyebo kipsengwet ako ng'wony, amu kiwinye tuguchu biiko chong'omen ako chonget akiborchi kichega lagok chomengechen, ee, Aboo, amu kichamak kile nyone mu taitang'ung'. ²² Kigono tuguuk togol Aboo: momi chii nyonget werii kile ng'o, kibate Aboo, akimonget chii Aboo kile ng'oo, kibate werii aku chii aka togol nyichame Werii, kuborjine kinyenda. ²³ Kuwekjigei alamalyenyi akileji mu ung'ot, "Berurotin konyek choroti tuguk choroti. ²⁴ Amu amwowok ale, kimache maotik chatya kiboto laitorinak kuuro tuguk chorotikwe akumamuch kuuro, aku kimache kugas tuguk che agasakwe akimamuch kigas. ²⁵ Aroo, kitonon kimng'omutyonde aka nyibo ng'atutek kutyam kinyenda kile, "Konetindoni, aiye nee sineityo nemi kayaiin anyoru saondanyibo koigeny?" ²⁶ Kiwolji Jeso kile, "Kikisir nee mu ng'atutek? kisomaninye kile nee?" ²⁷ Kuwolu kinyenda kile, " Cham kiptayande Kamuktaindeng'ung', mu muguleitang'ung' togol, ako mu sabondang'ung' togol, ako mu kimnateng'ung' togol, ako mu ng'omnateng'ung' togol, akicham chitab kokweng'ung' kile wolo ichamtogei. " ²⁸ Kileji Jeso, " Kewolu kikaram. Aiy kile nyenyi sinyoru sabon. ²⁹ Akinemi bani mache kukaramitgei, kileji Jeso, "Ng'oo chitab kokwenyu?" ³⁰ Kuwolji Jeso kileji, "Kiwo chitaka kingete Jerusalem akoi Jeriko, Kutuyo ako chor chekisare nguroikji akubir, akibakakta akilegit kima. ³¹ Aku kicho tisinde aka aranone, aku kineri kinyenda kibin taban. ³² Aku kineitu Lawinde yone kimi chichone , kuro akroop taban. ³³ Aku kineweti Samarinde mu bandanyi kiitu wolo kimi chichone, aku kineri kiriire. ³⁴ Kuwo wolo mi kinyenda akiratyi kimwook akiile mwai ako divai akikalapji sikiryenyiakumit kuwo gotab taek akiriip kinyend. ³⁵ Aku kineyech kunomu dinarisiek aeny akukoji chitab kibo goot akileji riib chichi ako tuguuk alak togol che inyoe chesire chu si nemi kayoin nawechgei acho ayokung'. ³⁶ Mu biichu somok ipkote ile ng'o nye chitap kokwenyi mu chichone kibir chori? ³⁷ Aku kileji, " Kinyenda nyakiriire chichone. ³⁸ Aku kinetikimi bandang'wang' kuchut nganase aka aku kitaach mu gonyi chepyose aka nyikugure Martha. ³⁹ Aku kitinye cheptang'wang' nyikugure Maria nyakitebekelyegap Jeso kigase ng'olyondenye. ⁴⁰ Aku kiimgei Martha mu boisionik chatya, aku kicho wolo mi kinyenda akileji, "Kiptaiyandani, ngimemekenye kiy tupchenyu nyakabakakta aboisyo kityo? Mwoji kutoroto. ⁴¹ Aku kiwolji Jeso kile, "Martha, Martha, riipgei meimjigei tugun chatya, ⁴² amu kito agenga nyikimache, aku kikilewen Maria kamasta nyakararan nyimakisare.

11 ¹ Kinemi bani kisoe Jeso mu woldo aka, akinewong'u, kileji aka mu alamalyenyi, "Kiptaiyandani, netech wolo kisoitoi kile bani kinet Johana alamalyenyi. ² Aku kileji kichega, "Bani asoe, amwa ole, " Aboo, ngulosunot kaineng'ung', ngucho baunateng'ung' (nguyay mageng'ung' mu ng'wony kileyo mu kipsengwet). ³ Konech amitwogikjo mu betu aka togol. ⁴ akinyoiwech gaat lelutikjo amu ahee kenyoijini gaat chalelwech. Matigonech kotyomut. ⁵ Akileji , "Ng'oo mu akwe nyitinye charwa akiwo wolo mi kinyenda kemoi kwen, akileji 'Charwani, kono makatinak somok abesen, ⁶ amu kakiitu charwenyu nyichone rutoi, akimotinye kiy nyogojini. ⁷ Kuwolji nyi mi go kileji, ' Kitimejiima, kikagar kirgenyu aku kikeruyo ako lagokju; momuche ang'eet akoning'. ⁸ Amwowok ale, akob ndimang'et kugoji amu charwenyi, ku amu somsenyi, kuchoni kuung'et kugoji kiy aka togol nyimache. ⁹ akomwowok ane ale asom sikegonok; awas sonyoru; akonykony sikeyotwok. ¹⁰ Amu aka togol nyisome kegojini, akunyuru nyowese, aku kinyenda nyikonykonye keyotyini. ¹¹ Aku kung'oo mu akwe nyi aboo nyi nesom wernyi makatia kumuche kugoji koi? Nde nesom samakia kumuchekugoji eren kugere samakiande? ¹² Nde ngusom mayaya kumuche kugoji togool? ¹³ Ngongetikwe cha yachen akoji lagokwok tuguuk chokororoneen, sire katyana kagoitoe nyogojini Abong'wong' nyimi kipsengwet Tamirmirye Nyotilil kichega chosome kinyenda?" ¹⁴ Kion anyu kinyenda chesawilye nyinamat kut. Aku kinekakimang'ta chesawilye, king'alal anyu nyekinamat kut, aku kikwong'io anyu tuiyosyek. ¹⁵ Aku kile alak, " One chesawilok mu Beelzebul, laitorande nyibo chesawiloi. " ¹⁷ Aku kinai kinyenda kapkotutikwak kileji, "Biik togol cho pchayegei kung'omogee, ambo koot aka togol nyipchayegee kiluule. ¹⁸ Aku ngipchaigei ambo chesawil kuyongtoi ano bororyenyi? Amu amwoe ole, aone chesawiloi mu Beelzabub. ¹⁹ Ngutu aone chesawiloi mu Beelzabub, kuone werikwok mu ng'oo? Nyone anyu aakojini kichega kuloku kirwogikwok. ²⁰ Aku ngutu aone chesawilok mu mornetab Jehovah, ku kakichonjok anyu baunatetab Jehovah. ²¹ Aku chii nyitinye kimnatee akutinye karikji choriibe gonyi kutebisoot tugukji mu kalya. ²² Aku bani kachonji chiit nyatogol kisiir kinyenda, akubel , kisare anyu kinyenda karikji togol chicham kuribegei akupchaita barunaikji. ²³ Kinyenda nyimakimi tuwai ku tayo, aku kinyenda nyi moime kiboto, kusariete. ²⁴ Bani kamang'ta tamirmirye nyaya mu chiito, kisiir wolo momi beek, kuwosote wolo mung'ee. Aku bani matukunyoru, kile, 'Awektogei gonyu wolo kiachone. ' ²⁵ Aku neit, kunyoru got kikebuch akehob kukararanit. ²⁶ kuwo anyu akumutu amirmiraik alak tisap chayachen kusiir kinyenda kuchut anyu arit akumeny wolone; akuyeitu meetab chichone kusiir nyebo tai. ²⁷ Aku kitikimwoe ngalechu, kimwa chepyose aka mu tuye kile, "Berurot moe nyikisijing aku berurotin kitinaik chekireer. " ²⁸ Aku lile kinyenda, " Berurotin kichega chi gase ng'olyondop Jehovah akuriip. ²⁹ Aku bani kiyumjigei kinyenda tuiyosiek, kutou kimwa kile, " Abeni ku abendo nya ya. Wase kaboruno, aku makugochini kaborune aka togol kibate kaborunetab Jona. ³⁰ Amu kile yokiloku kaborune Jona mu biikab Nineve, kile nyone ambo weritab chi mu abeni. ³¹ Tuun ng'ete Laitoriande nyi chepyoso, nyibo muret tai mu kirwoke kiboto biikab abeni, akurwogji kichega amu kiwer tabenwekab ng'wony kujo kigas ng'omnatetab Solomon, aku aroo, mi yu chiito nyo ou kusiir Solomon. ³² Tuun yong'soot bikab Nineve kiboto abeni mu kirwoke, akurwogji amu kisigu kichega mu amtaetab Jona aku aroo, mi yu nyo ou kusiir Jona. ³³ Momi ambo egenga, nyi nekakunam tait kugoji kureretab kitonge, aku kojini kiy nyoyong'e tait si neityo kuro lapkeiye chibeti go. ³⁴ Taitab bortang'ung' ku kong'tang'ung'. Nekararan kong'tang'ung',

ku nyitat bortang'ung' lapkeiye. Aku ne ngaya kong'tang'ung', ku nyitat bortang'ung' tuindo.³⁶ Ngu tu nyitaat bortang'ung' kimugul lapkeiye, akimetinye wolo le tuin, ku le bortang'ung' ambo tait nyo kwenye lapkeiye nyi kilapkeit mu kinye."³⁷ Kinewany kung'olole, kimwoji Parisainde aka kiba kwomisye tuwai mu gonyi. Kuwo anyu Jeso akitebi ng'wony akwomisyo.³⁸ Kikwong' anyu Parisainde amu kiomisye Jeso kimoun eun kirook kitomo keamisyo.³⁹ Kileji Kiptaiyande, "Akwe Parisaik aune kukombe barak kibot sani aku ariting'wong' ku nyitaat sarisie ako yaityo.⁴⁰ Akwe cho oi solwoi! Kinyenda nyi koiye sang' ku maiy ambo oriit?⁴¹ kokochinoik chebo tuguuk chimi orit, ak aroo, tililitu tuguuk togol mu akwee.⁴² "Aku Pwo! akwe Parisaik amu goitoyi kabeberwekab taman nyebo hedosmon ako ketik chomengechen, ako taye imanda ako chomnyetab Jehovah. Kaigai ke aiy mu imanda ako chamnyetab Jehovah, ku makimeto keaiy tuguuk alak ambo.⁴³ Pwo akwe Parisaik, amu achame ng'echorok cho tororen mu kapkorososiek ako torochse nyibo konyit mu sirosiek.⁴⁴ Pwo akwe, amu akargei ako kebenonik chi motoku che binote biik barak akimanae."⁴⁵ Kileji kimn'gomutyonde aka nyibo ngatutik kile, "konetindoni, kiyo imwoe ku kemulech ambo achega."⁴⁶ Kileji Jeso, "Pwo akwe, konetikab Ng'atute! Amu akalepchini biiko mile nyonyagis chimomuche kikalap, aku momuche ambo akwega atiiny ambo mu moren agenga.⁴⁷ Pwo mu akwe, amu atecher kererisikab maotik aku kibare kwanisiekwok kichega.⁴⁸ Kioleku anu baorinak aku achomnyeini boisionikab kwanisiekwok amu kichega che kibare aku akwe cho oteche kererikwak.⁴⁹ Kile nyone anyu, kile ng'omnatetab Jehovah, 'kiayokji kichega motik ako chokiyoktoi, ak kenyaliil akeber alak mu kichega.⁵⁰ Si neityo komage abeni karatikab maotik togol chi kikitarta king'ete kelumta ng'wony.⁵¹ King'ete karatikab Abel, akoi karatikab zakaria nyi kikueet mu kwenutab kaptisisyo ako gotab Jehovah. Ee, amwowok, ale kayain kemage abeni kikaram.⁵² Pwo akwe kimng'omutinek chibo ng'atutek amu aibe kipungue nyibo ng'omnate; mo chute orit aku akartoi ambo cho chute."⁵³ Bani kimang'ta Jeso mu wolone, kutou sirik ako Parisaik kitai kinyenda akutitiyo mu tugun alak chatya,⁵⁴ kiriip kile ndemo ngaap kinyoru ng'olyo nyi chone kotenyi.

12 Mu saisiechoche, bani kiyumgei elupusiekab biik chachaang' chebo tuiye, kututyargei, kutou kimwoji anyu alamalyenyi kileji, "Aibegai biitekap Parisaik cho aitogei.² Aku momikiy nyo ung'at nyi ma tuun naykse.³ Amu kiy aka rool nyo amwoe mu tun ku tuun kegase mu lapkeiyo, aku kiyo kyochomjigei itin mu got ariit ku tuun kemwoitoyi mu got barak.⁴ Amwowok, charwaikju, kitimaiywai chokeete borto, aku nebata, kimakitinye kiyo tukwoye kinyile.⁵ Aku atewok sanai kinyenda nyimagat aiywai; aiywai kinyenda, nyi bani kakibar, kitinye kimnate kuwirjok Gehena. Ee, amwowok kile, aiwaiy kinyenda.⁶ Iile makioldoe taritek muut mu chepkondok aeny cho mengechen? Aku momi ambo agenga nyi kuyutye mu taitab Jehovah.⁷ Aku ambo sumeekwok chebo met togol ku itotin. Kitimo iweisyoyi. Asirakwe taritichoche mengechen.⁸ Ak amwowok ale, "Aka togol nyi borto mu taitab biik ku tuun borto ambo weritab chi chichone mu taitab malaikainak chibo Jehovah.⁹ Aku kinyenda nyi tayo mu taitab biik ku tuun ketaye kinyenda mu taitab malaikainak Jehovah.¹⁰ Aka togol nyi mwoe ng'olyo nya ya akibo weritab chii kenyojini gaat; aku kinyenda nyimuule Tamirmiry Nyotilil, kimakinyojini gaat kinyenda.¹¹ Aku nemi bani kakimitak wolo mi sinagogisiek, ako taitab kirwogik, ako paunik, ku kitimacholyo akibo kiyo awolu nde kiyo amwoe:¹² amu netok Tamirmiry nyotilil mu sainone kiyo magat amwa."¹³ Kileji anyu chitaka mu tuye, "Kanetindoni, mwaji weri nyakitupche kipchaiwo tugukjo."¹⁴ Aku kileji kinyenda, 'Chichi, ng'oo nyi kogono aloku kirwoginde nde pchainde mu akwe?"¹⁵ Aku kileji kichega, "Aroo, akoripkei mu kasetab myat togol: amu matabe sabondap chi mu chang'indap tuguuk cho tinye."¹⁶ Kumwoji kalewene kileji, "Kimi mogorionde aka nyakiruryo tuguuk mu mbareny kisob.¹⁷ Aku kipkat mu muguleitanyi kile, 'Aiye nee amu motinye wolo agonoree bekju?"¹⁸ Aku kile, aiye kile nyi; abute chogenikju steh cho echen kisiir chu: sagonoree beekju ako tuguukju togol chokororneen.¹⁹ Si neityo aleji sabondanyu, "Sabondanyu, itinye tuguuk chatya chokororneen aku konorotin chi yame kanyisiek chatya, muuny, amisye, yeeise akibaibaitu."²⁰ Aku kileji Jehovah ii barbarinye, kimache sabondang'ung kemouni po rani. Ara sikibinji ng'oo anyu tuguchoche kakicheb?"²¹ Kuwong'u anyu Jeso kile, "Le nyone chiito nyigonorjinigei mogornate kinyenda kityo nyi ma mogoryo mu Jehovah."²² Kileji anyu Karupikji, kile nyone anyu amwowok kile, kitimacholyo akibo sabeng'wong' mu tuguuk choome nde akibo bortong'wong' kiyo aloche."²³ Amu siire sabe amitwogik, akusire borto ngurei.²⁴ Apkaat kira chepkiragoi, magolse akimakasisye, akimatinye wolo konore nde choge; aku Jehovah nyi baye: asirakwe taritek kinyil ata!²⁵ Ara ng'oo mu akwe nyimuche kigareer met si kitai koindanyi mu kakwaiye agenga nyibo eu?"²⁶ Ngitimomuche anyu aiy ambo kiy katigin, ku amunee anyu sagerer met akibo tuguuk alak?"²⁷ Apkaat taptoi, wolo piititoyi; maboisyoyi nde kuletso; aku amwowok ale, ambo Solomon mu boiboienyitoyi togol, ku kima kulumbane kile aka mu chwechu.²⁸ Aku ngitilokjini Jehovah kile nyone suuswek chibo kewani chamito rani ainei mutai kewirji ma' ara ibere sire nytyana anyu kulokwok akwe chotinye kayane nyomining!"²⁹ Kitimawas cho ome nde cho aiye aki magasegei.³⁰ Amu wase tuguuchwechu bororiosiek togol chami ng'wony: akunget aboong'wong' kile amakjinigei tuguchwechu.³¹ Ak awassikwe Laitornatetab Jehovah siketoswok tuguuchwechu togol.³² Kitimaiywai akwee akwoiye nyomining'; amu baibai Aboong'wong' kugonok Laitornate.³³ Aalde chotinye sokoite kagojinai sanapchigei sumbotik chimoyosiitu, ako konorwe mu kipsengwet nyimopoku, wolo mariikjine choori, akumooome kuyut.³⁴ Amu wolo mito konorweng'ung' ku wolone wolo mito muguleitang'ung' kinyile."³⁵ Ngiratagis suwenikwok, aku ngiloyo taisyekwok;³⁶ Akagargeitu ako biiko chikanye kiptaiyandeng'wang' kubunu tumdap katunisie: sinecho akigonygony, kiyoty kirge sainone.v 37 baibaiyen otwogichoche chi nyoru kiptaiyandanone kiriipse necho. Amwowok kisp ale, ratagei kinyenda akicheb biichoche kitabe ng'wony mu wolo amisye akuwo kibai kichega.³⁸ Akinecho mu riipse nyibo aeny, nde nyibo somok, akinyorto kile nyone, kibaibaiyen anyu otwogichoche."³⁹ Aku anai nyi kile, ndikoonget kiptaiyandetab goot sait nyichoni choriinde, ndariipse ndimapagoktoi gonyi kibit choriinde.⁴⁰ Achapgei ambo akwega amu choni werutab chi mu

sait nyimopkote."⁴¹ Kileji anyu Petero, "kiptaiyande, mwoweche kalewenoni, nde imwojini biiko togol?"⁴² Kile anyu kiptaiyande, "Ng'oo anyu ribinde nyikiyane aking'om, nyigojini kiptaiyandenyi kitononji gonyi, akugoji amitwogikwak chiyame mu beetu nyimakjine?"⁴³ Baibai otwogindonone nyi nyoru kiptaiyandenyi kwoe kile nyone.⁴⁴ Amwowok kisob ale, gojini chichone kitononji tuguukji togol.⁴⁵ Aku ngimwa otwogindonone mu muguleitanyi kile, 'Koye kiptaiyandenyu masip kiitu,' akitou kibir otwogik chile murenik ako tibiik, akwomisyo akuyeiso kitibogit.⁴⁶ Wehegei anyu kiptaiyande nyibo otwogindonone mu betu nyikamaganye, ako mu sait nyi manae akibir kisob akipchajji kamastanyi kiboto hi matinye kayane.⁴⁷ Aku otwogindonone nyi konget magetab kiptaiyandenyi, aki machapegi, nde kwai kile magenyi, kibire birutik chatya;⁴⁸ Aku kinyenda nyi kimonget akwai tuguuk chinyolu biree, kebire pirutek chongering; aku aka togol nyakigojini chatya, ku nemi kayain kemage chatya: aku kinyenda nyikigojini kiriip tuguuk chatya, kinemi kayain kemage kinyenda cho siire.⁴⁹ "kiachoo awirji maat ng'wony, nee anyu nyitomache nekakilai ra!"⁵⁰ Aku atinye kabatisane nyinemi tuun kebotisaneno; marich katyana agoi kusulda!⁵¹ Abere kiocho agonu kalya kicho ng'wony? Amwowok kile olo, aku pesyot.⁵² Amu king'ete ra, kipchayagei biiko mutu chami got agenga, aku saregei somoku aenyaku saregei aenyu somok.⁵³ Pchayage aboi ako werii, ako werii, ako aboi, kamite ako cheptanyi ako chepto ako kamitenyi, ako kamitetab weri kiboto chepyosetab weri, ako kametab weri ako kametab werii."⁵⁴ Kimwoji anyu tuye kile, "Naroo kilong'u boldecherongo, wolo mache kirobon aku kwaiyak kile nyone anyu.⁵⁵ Aki naroo koristo nyichone muret tai ole mache kiitu kamayu nyang'waan aku kwaiya kile nyone.⁵⁶ Kiplasgeinachu, onget anai wolo taptot ng'wonyu ako kipsengwet; kainee anyu si manai wolo taptot betsyechu?"⁵⁷ "KAine simorwoch akwege bungo akibo tuguuk chibo imanda?"⁵⁸ Amu netobeti ako bunyondeng'ung' taitab kirwoginde, igilgei abeti mu aree si kimating si makumiting' taitab kirwoginde akimitying kirwoginde askarinde, akitorjing' askarinde korgore.⁵⁹ Amwaung ale, maagoi imongu mu wolone akoi iyakta chepkonde nyibo let."

13 ¹ Kimi bik alak mu betusiechoche chekimwaji kinyenda akibo Galilaek chekiburuch Pilato karatikwak ako tiseiwekwak.² Kowolji Jeso akileji, "Ara imwoe ile Ki kiptengegin bichoche bo Galili kisiir Galilaek togol amu kinyoru nyalilwokichu?"³ Amwowok kile achicha, aku ngitimosigu, akwe togol, abogu togol kile nyone.⁴ Nde choche taman ak sisit chakishap got nyo goi mu siloam, akibar, ara amwoe ole ki kiptengegin kisiir bik togol che kimi Jerusalem?"⁵ Awowok ale achicha, aku ngimosigu, ambo akwe aboku togol kile nyone."⁶ Ako kimwa kalewenaik, kileji, "Kimi chito aka nyekitinye mogoiywo nyekikakiminji mbarenyi nyibo sabibu; aku kicho kimarar logoek chibo ketone aku kimanyorji."⁷ Kileji ribindetab mbarani bo sabibu, 'Iroo, keniyini ku nyibo somok achoni anaye logoek mu mogoiywoni akimonyorune kiy. Yab kuluul, amune sikwome nying'winyek kileen?"⁸ Akiwolji kileji, Kiptaiyandani, nguteb keniyini si asemberji akokoji sige.⁹ aku ngi yii logoek kung'ete ra ku kararan, aku ne mo yii ayab anyu kuluul."¹⁰ Kinetisyo anyu Jeso mu sinagogisiek mu betitab sabato.¹¹ Ak aroo, chepyoso aka nyekitinye tamirmir nyibo nyaluulnat kenysisiek taman ak sisiit, aku kikakung'uruch amu kimakumuche kuchulgei.¹² Kineri Jeso kinyenda, kuguur akileji, 'chepyosoni, kaketiaching' mu Nyalulnateng'ung'.¹³ Aku kigonor eunekji kinyenda, kuchuulak kile nyone akulosu Jehovah.¹⁴ Kinerech anyu baunindetab Sinagogi amu kisoob Jeso chito mu betutab sabato. Kimwoji anyu tuye kileji, 'Mito betusiek Lo che michini kiboisyo biiko, abka anyu mu betusiechoche si kesoobok, aku ma mu betutab sabato."¹⁵ Kuwolji Kiptaiyat kileji, "Akwe chombilik, ara matyoche aka togol mu akwe eitanyi ndeku sigiryenyi mu kibiiy mu betutab sabato akurany kuya bei?"¹⁶ ara chepyosoni cheptab Abraham nyi kikurat chesawil kenysis taman ak sisiit, ara moyene ketiach mu ratutyoni mu betutab sabato?"¹⁷ Aku bani kitikimwoe ng'alechwechu, kililanjo bunikji aku baibaitu tuye kimugul akibo tuguuk chotororen che kiai kinyenda.¹⁸ Kimwa anyu Jeso kile, Kargei baunatetab Jehovah ako nee, aku amuche akargeit ako nee?"¹⁹ Kargei ako kosuyondop karadali, nyakanam chiito akuminji mbarenyi, kibiit akuloku ket nyo ou, aku kipka tariit chibo barak akitabee tamaikji."v 20 Aku kimwa kinyile kile akargeit baunatetab Jehovah ako nee?"²¹ Kargei ako biita chekinam chepyoso akuwarware bisha chibo karebotin somok, aku kiguutu togol."²² Aku kibnote Jeso kokwotin cho echen, kunetisyote kitakjinigei aretab Jerusalem.²³ Kileji chito aka, "Kiptaiyandani, ara ngering' chi nemi tuun kesaru?"²⁴ Ogilgei abun kirge nyamarich, amu amwowok kile, Chaang' cho tyeme kubun, aku momuche kubun."²⁵ Aku tuun kang'eet chitab kobo got, akugar kirge, atou anyu atonone sang' agonyonye kirge abere, Kiptaiyandani, yotwech, aku wolwok kinyenda kile, 'Mongetok ako wolo abunu'.²⁶ Atou anyu ole, 'kikwomisie akeyeiso mu taing'ung' aku inetisyo mu artinwekjo."²⁷ Aki wolwok kinyenda kile, 'Amwowok ale, mongetok ako wolo abunu. Aba mu wolo amite, akwe togol kiboitinekab lambach!"²⁸ Loku anyu riira ako nyiyetab kelek bani aroti Abraham ako Isak Jakobo ako maotik togol mu baunatetab Jehovah, aku kiwirinok akwe sang'.²⁹ Tuun pkoni king'ete kong' asis ako cherongo, ako muret nyibo katam ako muret nyibo tai, akutbe ng'wony akwomisyo mu taitab Jehovah.³⁰ Anai nyi, chi loku chibo let ku tuun loku chibo tai, ako chibo tai ku tuun loku chibo let."³¹ Kipka Parisaek alak mu sainone akileji, 'Ng'eet mang'te uui mu woli, amu mache kibaring' Herod.³² Kileji Jeso, 'Aba komwoji cheptibinone aleji, 'Roo, amite aone oik akosoobe biik rani ako mutai, aku mu betutab somok, ku kikait magenyu.'³³ Aku konyolu awo bandanyu rani ako mutai ako betu nyibo somok amu mamijini kimeechi maotyondo sang' nyibo Jerusalem."³⁴ Ee, Jerusalem, kinye nyaibare maotik akiwire kichega chi kioyogung'. Kiamach kinyil ata anyu ayum lagokju kile ngok nyiyimjini chilchilenikji kabebaikji, aku kimamachikwe nyenyi.³⁵ Aroo, kakemete kong'wong'. Amwowok kile, marooto agoi ole, 'Berurot kinyenda nyi choni mu kainetab Kiptaiyat."

14 ¹ Kinemi betu aka nyibo sabato, bani weti gotab kondoindetab Parisaek si kwomisyo, ku kiriipote kinyenda.² Aku kimi chi tainyi nyikikakunun borto.³ Aku kitebe Jeso Kimng'omutinekap ng'atutikap Yahudik ako Parsaik kile, "Ibere

Chamtayat mu ng'atutek Kesoob chi mu betutab sabato, nde olo?"⁴ Aku kisiisyo. Kinam Jeso eunyi akusoob kinyenda, akung'unda kuwechigei. ⁵ Kileji kichega, "Ngoo mu akwe nyi tinye sikiryenyi nde ku eitanyi nyi nechut kaben ku ma nomu amu betutab sabato?" ⁶ Kisiisyo togol aku kimamuch kuwolu kiy mu ng'alechoche. ⁷ Aku kinenai Jeso kile kilewen ng'echorokab tai kichega che kikagigur tumdo, kimwoji mu kalewenaik kile, ⁸ "Bani kataaching' chi mu tumdab katunisiye, iro metebe ng'echeretab tai, amu muuche kimi chii nyikakitaach nyi konyitoot kisiir kinyende. ⁹ Bani kaitu chiito nyi katochook tuwai, kilejing' 'Kochi chito nyi aka kitabe woldang'ung', aku mu tawernat iweti itabe ngacheretab let. ¹⁰ Aku nekitaaching', iwe akitabe ng'acharetab let, si neitu kinyenda nyikatooching' ku muche kilejing', 'Charwenyu, choo tabe tai woli.' Ku kegonyiting' mu taitab kichega togol chomi mese. ¹¹ Amu chii aka togol nyitroregei, ku kewolune, aku aka togol nyiwolunegei ku ketorore. ¹² Kileji Jeso kinyile chikai katooche kinyenda, "Neguurchi chii amitwogik nde tumdo, ku kitimetaach charwaiguk, nde ku werikwok nde ku bikab areng'ung', nde ku bikaab kokweng'ung' chile mogoro, amu muuche kugoting' betu aka kutaaching, aku kagekotung'. ¹³ Aku nechob amitwogik, iguur kibananok, cho ng'wolsoot, chemugungon ako chepkorotoi, ¹⁴ Aku sikeberuring' amu matinye kichega kiyo kotung'. Amu kigotung' mu betutab ngetietab imanda. ¹⁵ Aku kinegas agenga mu che kimi togol mese agenga kiboto Jeso ng'alechu, Kileji kinyenda, "Beruot kinyenda nyi nemi tuun kwomisye mu baunatetab Jehovah!" ¹⁶ aku kileji Jeso kinyenda, "Kimi chi anum nyekicheb amisye nyo ou akutaach chatya. ¹⁷ Aku kineit saitab amitwogik, kuyokto kiboitiondenyi kileji kichega che kikakitaach, 'Apka amu kakichobokis ra kiy aka togol. ¹⁸ Kutou togol kuwolu kiy nyi katae. Kileji chito nyibo tai, 'Kaal mbare aku magat awo sineityo aroo. Kaigai chamwo. ¹⁹ Kimwa aka kile, kaal einak mut chibo chogik akaweti atyeme, kaigai chamwo awo. ²⁰ Kile aka, kaatun chepyosenyu, ara anyu machoni. ²¹ Kicho anyu kiboitondekai akileji kiptaiyandenyi ng'alechoche. Kinarech anyu chikai bo got akileji kiboityondenyi, 'Ui chakta ortinwek chokindon ako cho mengechen, mu eme akimutu kibananok, cho ng'wolsot, ako chemugungon. ²² Kileji Kiboityonde, 'Kiptayandani, kiyo keng'ata, ku kikeyai aku tikimi boroinde. ²³ Kileji anyu kiptaiyande, kiboityondenyi, 'Ui anyu artinwek chokindon ako rotyosyegab mbarenik akisaisai kipka go sineityo kinyiy gonyu. ²⁴ Amu amwowok ale momi ambo agenga nyi kiagur nyichamchame amitwogik. ²⁵ Kimi anyu tuye nyo ou kibeti kiboto kinyenda, aku nyi matyanit, kuweggei akileji kichega, ²⁶ "Nemache chii aka togol kichonjo, akimasase aboonyi, ako kamenyi, ako chepyosenyi, ako lagokji, ako werikwak ako tibikwak, ako ambo kitai sabondanyi, kimomuche kiloku alamalyenyu. ²⁷ Aka togol nyi maibe kimurtoyondenyi akurupka kimoloku alamalyenyu. ²⁸ Amu ng'o mu akwe nyinemeche kiteech got nyogoi, kimatabe ng'wony kirook akuit ngutumuche kitinye tuguuk chomuche kuwang'tae? ²⁹ Si ma ngutonon tekse ku matukumuch kuwany, kitou biiko kuchurochur kinyenda, ³⁰ kile, 'Kitou chichi kitekso akumatukumuch kuwang'ta. ³¹ Nde Ng'oo laitoriane nyiweti kibargei ako laitoriane aka, akimatabe ng'wony korok akirar wolo taptoi ngutumuche kinyenda ako biiko elupu taman kutuiyo akibargei ako nyotinye biiko elupu tiptem? ³² Ki nemomi, bani mi kiboriotinek chu alak wolo lou, kuyokto ng'olyo sikitebe akibo kalya. ³³ Nyone anyu, chi aka togol mu akwe nyimomuche kimete tuguukji togol kimomuche kuloku kiboityondenyu. ³⁴ Kororoneen chumbik, aku nebot chumbi anyinyindanyi, kimuktoiano keweku kuloku chumbi kinyile? ³⁵ kimakitile kiy mu nying'winy. Kuwirti. Nyi tinye itilik chi kastoe, kikasta.

15 ¹ Aku kipka anyu tookikab aisrusyek ako kipng'okiinek wolo mi Jeso sikikas it kinyenda. ² Kunyinyiyo Parisaik kibto sirik kibere, " tooche chichi kipng'okiin akwomisie ambo ambo ako kichega. ³ Kimwoji Jeso kichega kalewenoni, ⁴ " Ng'o chii mu akwe nyo tinye kechirek bogol nyi nebet agenga mu choche ku mobokotoi choche tamanwogik sogol ak sogol mu suur kween akuwo kuwasata nyone kabet akoi kunyuru? ⁵ Aku nekakunyoru, kuwire gaat akubaibit. ⁶ Aku nekakiit gonyi, kuguur charwaiky kiboto bikab kokwenyi, akileji, 'Ngeboiboitu togol amu kikonyoru kechenyu nyikikakibet. ⁷ Amwowok anyu kile, ambo tuun kuloku nyone boiboie mu kipsengwet nesugu kipng'okio agenga kusiir biiko tamanwogik sogol ak sogol chi mamache kusugu. ⁸ Nde ku chepyoso agenga nyetinye chepkondok taman, aku nebet agenga, monome tait , akubuch got, akuwas mutyo akoi kunyuru? ⁹ Aku bani kikonyoru, kuguur charwaiky togol ako bikab kokwenyi, akileji, 'Ngeboiboitu togol mu kikonyoru chepkondenyu nyikikakubet. ¹⁰ Kile nyone ambo, amwowok , mito boiboie mu taitab malaikaisyekab Jehovah mu kipng'okio agenga nyi kosugu. ¹¹ Kileji Jeso, " Kimi chi nyekitinye werikyi aeny, ¹² aku kileji weri nyomining abonyi, ' Aboo, konoo tugukchu che tuun bunjino.' Aku kipchaichi tugukwak tuwai. ¹³ Aku kinebata betusiek chi matyana, kuyum werikai mining' tugukchi togol akiwo koree aka nyolou, kuwo kusaret mu woline tugukchi mu ateb nyangaya. ¹⁴ Bani kikuwany tugukchi togol, kucho kemei korekai togol, kutou anyu werikai kinyalil. ¹⁵ Kuwo kukaktagei chito aka nyibo koronone, nyekiyoktoi kinyenda kibaichi nguron mu mbarenyi. ¹⁶ Kimache werone kwam tuguk chekyome nguronik amu kimogoji chii kiy nyoome. ¹⁷ Aku kinepkatita werikai kimwa kile, ' Tyana kiboitinekab abonyu chotinye tuguk choome kiyam kutung'otu aku kibarane ruba mu yu! ¹⁸ Ang'ete mu yu akowechigei wolo mi abonyu, akoleji, " Aboo, kikoleji kipsengwet akolelung'. ¹⁹ makisikjini ambo kegureno wering'ung'; aiya aloku agenga nyibo kiboitineguk. ²⁰ King'eet anyu akuwo wolo mi abonyi. Aku bani kitikimi wolo lou, kuuro abonyi kinyenda, aku kiriire, akulabat akubutyi katinyi akuwire asak. ²¹ Kileji weri kinyenda, " Aboo,kikoleji kipsengwet akalelung'. Makisikjini ambo kegureno wering'ung'. ²² Kileji aboi kiboitinekyi. ' Aibu ochokune ngurie nyakararan kusiir togol akolokyi, akokochi peteyo eunyi, akolokyi kweron kelyekyi. ²³ Akomutu moita nyayakwai akayeny. Akany keboiboitu akeamisy! ²⁴ Amu werinyu nyenyi kikakima aku ra ko kikusob. kikukubet , aku ra ku kikutoku. Kutou anyu kiboiboitu. ²⁵ Aku kimi weri nyo ou mbar. Bani kicho kilekititu mu kaita, kigas tienwo ako biich chinyolsoot. ²⁶ Kuguur agenga mu kiboitinek akitebe kile muche kinee ng'alechu. ²⁷ Kileji kiboityondekai kinyenda, 'Kikucho wering'wong' gaa akikikuyeny abong'ung' moita nyayakwai amu kikonyoru kinyenda kichamagei. ²⁸ Kinarech anyu weri nyo ou akitai ambo kuwo go

orit , akoi kucho abonyi sang' kusaisai kinyenda.²⁹ Kuwolu werikai ou akileji abonyi, ' Roo, kenyisyechu togol chang' kikobeisyeung', akitomo abut ngatutyeng'ung', akitomo ambo ikonoo warwab araa sabaibaitu ako charwaikyu,³⁰ akineitu wering'ung' nyekiam tugukuk ako chemilain, iyengji moita nyayakwai.³¹ Kileji aboi kinyenda, 'Weri, kimi tuwai betusyek togol, aku tugukyu togol ku chokuk.³² Aku kasikjini keboiboitu akenyal, amu wering'wong' ki kikakima, aku ra kisabe, kikakubet aku ra ki kakenyuru."

16¹ Kimwoji kinyenda alamalyenyi kinyile kile, " Kimi chi nyekimogoryo nyekitinye ribin nyekitononjini konyi, akikimwa kele sariete tugukab mokoryondonone.² Kiguur anyu mokoryondonone kinyenda akileji, ' Nee nyi agase akibo kinye? Kono koitetab ribseng'ung' amu mailoku ribindenye.³ Kile ribindonone mu muguleitanyi, 'Aiye nee ra amu kakisto kiptayandeyu mu boisie? Akimotinye kimnen abotisye, akimokenye asomsoote.⁴ Anget kiyo aiye, sinemi bani kakichorwo mu boisie, kitacha biik mu gorikwak.⁵ Aku kiguur aka togol mu basenikab kiptaiyandenye, akileji nyibo tai, ' Kibesen ata tugukab kiptaiyandenye?'⁶ Kile, ' Terenik bogol chibo mwai.' Kileji, ' Nam kartasing'ung' akisir konom ichokyi.⁷ Neityo kileji aka, ' Ang' kinye kibesen ata?' Kileji ' terenik bogol chibo ngano.' Kileji, ' Nam kartasing'ung' akisir tamanwogik sisit.⁸ Kisas kiptaiyande otwogindonone kimobo iman amu kiyy mu ng'ommen. Amu ng'omen werikab ng'wonyuni kwoiye ngal ak biik kisiir werikab lapkeiyo.⁹ Akamwowok ole, anamegei charwai mu aretab mogornondi nyi mobo iman, si tuun nebok kitachak mu gorikwak chibo koigeny.¹⁰ Amu kinyenda nyikiyene mu tugun kongering, keyene mu chatya, aku kinyenda nyimakiyene mu kongering, kimakiyee mu chatya.¹¹ Lee nyone anyu, nemeloku nyekiyene mu mogornondi nyi mobo iman, ku ng'o nyine yenok mu mogornondi nyibo iman? ¹² Nemoloku chekiyane mu tuguukab chito aka, ara ikure ng'o anyu nyekonok tuguk che chokwok?¹³ Momi otwogindo nyimuche kuot kiptainak aeny, amu muche kisas aka, akicham aka, nde kinamgei ako aka, kisas aka. Memuche iot Jehovah ako mogornondi."¹⁴ Kigas anyu Parisaek chekichame chepkondoi tuguchoche togol, akurorji kinyenda.¹⁵ Kileji kichega, " Akwee chi oitogei nyakararan mu taitab biiko akunget Jehovah muguleiwekwok amu kiy nyitorore biik, ki banat mu taitab Jehovah.¹⁶ Kitebe ngatutik ako maotik akoi kiitu Juhana. King'ete batunone akoi, keamtoi logoiwek chokororneen chebo baunatetab Jehovah, akityeme chitogol kutorta arenye kuwo yune.¹⁷ Akunyumnyum kusiirto kipsengwet ako ng'wony, kisiir kebut siruutye agenga nyibo ng'atutik kiyait.¹⁸ aku chii aka togol nyi oone chepyosenyi akuib aka, ku kibaigeya, aku chii nyiibe chepyoso nyikionu bondenye ku kibaigeiya.¹⁹ " Ak kimi chii anyu nye ki mogoryo nyekiloche ngurye nyo arus nyobirir nyachikinin, aku kiboiboitegei betu aka togol mu mgornatenyei.²⁰ Aku kii kibanania nyi kikugure Lazaro nyi kikuyoto mu kurgenyi akinyiyotin kimng'ooi bortanyi.²¹ Aku kimache kebaye tuguk chekichundoi mu masetab mogoryondonone, ee, kipkoni ambo sesenik akimel kimng'ookyi.²² Aku kiit kima kibananiandekai betu aka, aku kimit kinyenda malaikain akoi kugoji tagetab Abraham. Kima ambo mogoryondekai aku kikitub, ²³ ako bani mito woldap chekikibok, kinyal barak aku kiuro Abraham mu wolo kilou aku kimi Lazaro tagenyi.²⁴ Aku kiriir akile, " Aboo Abraham, riirena akiyogu Lazaro kuchukta bei walistab mornenyei, sikiruswo ng'alyaptanyu amu ami ng'wonin mu mai laye.²⁵ Aku kileji Abraham, 'Weri , pkaat bani kinesabe, kinyoru tuguuk chokororneen, kile nyone lazaro, kinyoru tuguk chayachen, aku ra kekoikoye kinyenda mu yu, aku inye ku imite ng'wonin. ²⁶ Aku nyosire chu togol, kikugoji ng'atwa nyo ou nyo besyotech ache ako akwe, si neityo chomeche kulong'u mu woli kipka wolo amikwe kumomuche, aku momi nyolong'u king'ete wolone akoi wolo kimiche."²⁷ Kileji mogoryondekai, ' Kasoming abonyu abraham, kile yoktowo kinyenda kuw gotab abonyu, ²⁸ amu atinye werikyo mut, si neityo kutechi si mapka woli mito nyalil nyo ou."²⁹ Kileji Abraham, ' Tinye kichega Musa ako maotik ; kany kigas kichega. ³⁰ Kuwolu mogoryondekai kile, ' Olo, aboo Abraham, newo chii wolo mi kichega nyichone wolo mi chikikubok , ku sugu. ³¹ Kileji Abraham kinyenda, 'Ngitumagas Musa akomaotik, ku magase ambo ntisaisai chii nyichone wolo mi chekikubok."

17¹ Kileji kasubikyi, " Pkoni kanakutek matiny: aku pwo! Mu chichonee bunu! ² Ki takaigai mu kinyenda keratyi katinyi koibabai nyo oo, akewirji araraita, kusiir bani nache aka mu chu mengechen.³ Oripkei: nelelung' tupcheng'ung' nyo otupche, igar kong', aki ne sugu, inyoji gaat. ⁴ Ako nelelung' kinyil tisab mu betu agenga, akugotugei wolo imi kinyil tisab kibere, kaasugu, inyoji gaat.⁵ Kileji che kiyoktoi kiptaiyat, " Taswech kayaneno."⁶ Kileji kiptaiyat, " ndotinye kayane nyotene kasuyondop aradali, ku namwoji mogoiywoni oleji , keng'usung' si keminjing' araraita, kukosok iit.⁷ Aku mi ng'oo mu akwee nyitinye kiboityonde nyibatisye nde nyo yagee kechirek nyolejini bani kaitu mu mbar, " Joo tabee ng'wony amisyey?" ⁸ Tos ma kaigai kileji kinyenda chopko tuguk cho ome kermenge akiboisyewo, agoi aamisyey akayeiso, si neityo iyamisyey akiyeiso kinyende?⁹ Ara wekyine otwogindonone kongoi amu kai tuguk che kakaking'at kwai? ¹⁰ Le nyone mbo kayoin mu akwee, bani kikaai tuguk togol che kaking'atak ; amwa ole kii otwogik chi matile kiy; kakeai chi kasikiy keai.¹¹ Bani kitikimi aree kuweti Jerusalem kubun kwenutab Samaria ako Galilaya. ¹² Aki nemi bani komong'ji kokwee aka, kutuyo ako murenik taman chikitinye mogondoi, chekitononsoot mu wolo loou. ¹³ Kuwokcho kile, " Jeso kiptaiyat, riranech."¹⁴ Kinemi bani kiro kichega, kileji, " Aba oborjigei tisiik." Aku kinemi bani kakiba, kitililitu. ¹⁵ Aku kineero aka mu kichega kile kakusop, kuwechgei kulosunonu Jehovah mu kotee nyo oou. ¹⁶ kibutyi kelyekyi kuwekyi kongoi; aku ki Samarinde chichone.¹⁷ Kuwolji Jeso kile, " Kimotilil taman? Aku mi ano chagai sogoolu? ¹⁸ Ara motogu ambo agenga nyakawegei kugoji kolosune Jehovah, kibaate kibat toondoni?" ¹⁹ Kileji kinyenda, "Ng'eet siwe, kakusoboning' kayaneng'ung'"²⁰ Aku kinemi bani kitebee Parisaik kile, joni oyu laitornatetab Jehovah, kuwolji kichega kile, " Majonii laitornatetab Jehovah kerotonu: ²¹ aki ma kimwoe kele, oroo, mi woli! Nde onyi mi woli! Oroo, mi laitornatetab Jehovah kwenung'wong'."²² Kileji kasubikyi, tuun pkoni betusyek chi nemi tuun amache aroo betu agenga nyibo weritab chii , aki morotii. ²³ Aki nemi tuun kilejinok , 'oroo, mi woli! Oroo, mi woli! Kitimaba nde arup kichega: ²⁴ amu lee karyalee

nyiryalune kamasta aka mu kipsengwet, aku kweny agoi kamasta aka mu kipsengwet: kinemi tuun kile nyone weritab chii mu betunyi.²⁵ Aku kargee anyu kenyalil mu tugun chatyaang', akutai kinyenda abendeni.²⁶ Aku kilee bani kipkondoi mu betusyekab Noah, kinemi tuun kuloku nyone mu betusyekab weritab chii.²⁷ Kyomisye, kiyeisye, kwobogei, akegoitoi alak keob, agoi betuu nyikiwo Noah moinge ariit, aku kiicho kutyande, akibar kichega togol.²⁸ Kile nyone ambo wolo kipkanda mu betusyekab Lot; kikwomisye, akeyeiso, kikwolisyee, akealdoisye, kikukolse, aketekse;²⁹ aku mu betu nyikimanda Lot mu Sodom kirooben maat ako koin che laisoot che kibunu kipsengwet akibar togol.³⁰ Lee nyone mu betu nyikibooru weritab chii.³¹ Mu betunone, kitimoroku kinyenda nyimi goot barak, kuib tugukyi chemito go; aku kitimakotugei kinyile kinyenda nyimi mbar.³² Apkaat chepyosop Lot.³³ Aku kinyenda nyo wese kusoru sabondanyi kuboot, aku aka togol nyiboote sabondanyi kiriipe.³⁴ Amwowok ole tuun rusoot biko aenyu mu kitogu agenga mu kemoyunone, kimite aka, kebagakta aka.³⁵ Tuun ng'oise chepyosok aenyu kibagenga, kimite aka, kebagakta aka.³⁶ Tuun mito biko aenyu mbar, kimite aka, kebagakta aka.³⁷ Aku kitebe kinyenda kile "Ano kiptayat?" Aku kileji, wolo mi muusto, kiyumjinigei motonyik.

18¹ Kimwoji anyu kalewene kile, Sikyini kesai betusyek togol, aki kitimoloku soroton.² Kileji, "Kimi kokwee aka kirwogindo nyi kimakuywei Jehovah, aki makiite chii.³ ako kimi mosogee aka mu kokwonone nyikichoni sait aka togol wolo mi kinyenda, akilejini besyewo imandanyu nyibo kisob ako bunyondenye.⁴ Aku kitaye mu betusyek chatyaang', aku nemi let, kimwa mu moenyi kile, 'ambo ntimoiywei Jehovah, aku moiite chii,⁵ aku amu nyaliloo mosogoni, aichini imandanyi si ma kujoni sait aka togol kusumbono.⁶ Kile kiptayande, "Agas anyu kito nyokimwa kirwoginde nyi mobo iman.⁷ Ara moichini Jehovah imanda biiko chi kikilewen, cho rirjine kinyenda beet ako kemoi, aku muitoi kinyenda akibo kichega?"⁸ Amwowok ole, aichini kinyenda kichega imanda kuchokyini. Sineityo tuun nejo weritab chii, kunyuru kayane mu ng'wony.⁹ Aku kimwoji kinyile alak kalewenoik chiki mong'u kile bo kichega imanda, akusase biiko alak.¹⁰ Kileji, "Kilaany biko aenyu kiba kisai mu kapkoros, Parisainde aka, ku ki toogindetab aisuruuk aka."¹¹ Kitonon Parisainde, akusaai, aku ng'alal kityo kile, "Jehovah, amwoung' kongoi amu makargeine ako biiko alak cho serebich tugun, chi mobo iman, cho ibagei, nde chiichi tooche aisurusyek.¹² Arugutagei kinyil aeny mu wiki, agoitoi kabebertab taman mu tuguk togol chonyoru."¹³ Aku tononon chiito nyitoche aisurusyek mu wolo loou aku macham ambo kimarar kipsengwet, akuluchgei tagat, akile, "Jehovah, rirena amu ai kipng'okiyo."¹⁴ Amwowok ale ii, kiwechigei chiichone gonyi nyikikuloku nyibo iman, kisiir chiito nyii aka, amu chii aka togol nyisutagei barak, kewolune kucho ng'wony, aku chiito nyi ibagei ng'wony, kesute kuwo barak."¹⁵ Aku kimutyi biiko kinyenda manyurinak si neityo kutiiny kichega, aku kinemi bani kiiru kasubikyi, kigar kong'.¹⁶ Kuguur Jeso kichega kipka wolo mi kinyenda, akileji, "Achamjii lagok chomengechen kipkonjoo, amu bo chile chwechu laitornatetab Jehovah.¹⁷ Amwowok ksoob ale, chii aka togol nyi motooche laitornatetab Jehovah kilee lakwa katigin, kimemong'jini woline nyi matiny."¹⁸ Kitebe kinyenda chemogee aka kile, "Konetindoni kararan, sikjini aai nee sineityo anyoru sobon nyibo koigeny?"¹⁹ Kileji Jeso, "amunee si kureno nyakararan? Momi chii nyakararan kibate agenga kibat, nyone ku Jehovah.²⁰ Ara inget ng'atutik, motoibgei, mebarishe, mechorso, matimwaa lambach, konyit aboong'ung' ako kameng'ung'?"²¹ Kimwa kile, "Kioriip tuguchu togol king'ete kitoi naran."²² Kinemi bani kigas Jeso kileji, "Tikikartayat kito agenga mu kinye; ui alde kiy aka togol nyoitinye akigoji kibananok, sinyoru konorwee mu kipsengwet, akijoo irupka.²³ Bani kigas kinyenda tuguchu togol, kichol ksob, amu ki mogoryo."²⁴ Bani kiiru Jeso kinyenda, kimwa kile, "Koroom katyana mu chii nyile mogoryo kimongji laitornatetab Jehovah!"²⁵ Amu nyumnyum mu taambus kuchut kongtab sindanu kisiir kimongji mogoryo laitornatetab Jehovah."²⁶ Kimwa anyu cho kigase kile, "Ng'oo anyu nyi kisuru?"²⁷ Kimwa kile, "Tuguuk chimomuchagee mu biiko, kumuchagee mu Jehovah."²⁸ Kiwa Petero kile, "Roo anyu, kikematache tugukyo akerupung'." ²⁹ Aku kileji kichega, "Amwowok ksob ale, momi chii nyikikibakakta goot, nde chepyosenyi, nde chotupcho, nde ku sikikiyi, nde lagok, akubo laitornatetab Jehovah,³⁰ nyimo nyoru chatyang' kisiir mu betusyechu, ako sobon nyibo koigeny mu betusyek chipkoni kayaiin."³¹ Bani kimutu anyu taman ak aeny kipka wolo mi kinyenda, kileji, "Aroo anyu, kiloonye kebeti Jerusalem, si kisikiji tuguk togol chikimwa maotik akubo weritab chii.³² Amu kigojini kinyenda eunekab pororyosyek si kechurochur, aketewer, akeng'utyi.³³ Akebiree kipchoritii, akebar, aku ng'eet mu betutab somok."³⁴ Aku kimanai kichega tuguchwechu ambo agenga. Ako kiunyogis ng'alechu mu kichega, Akimamuch kubesyo tuguuk che kikimwa.³⁵ Aku kinerikta Jeriko, ku kitabee ng'wony chiitaka nyile chepkorot mu aree taban kusoomse.³⁶ Kinegas kusiirtoi tuye, kuteeb kile "Nee chu?"³⁷ Kuwolji kichega kinyenda kileji, Jeso nyibo Nazaret nyone sirtoi.³⁸ Kuwaach chigai kile, "Jeso, weritab Daudi, rirenaa."³⁹ Kigar kong' kinyenda biiko chi ki ndoe, kileji siis. Kitastai kinyile kuwaach kile, "Weritab Daudi, rirenaa."⁴⁰ Kutonon Jeso akung'at kemutu kuwo wolo mi kinyenda. Aku kinemi bani kikiriigu, kitebe kinyenda kileji,⁴¹ "Imache ayuung' nee?" kuwolu kile, "Kiptayande, amache amararta."⁴² Kileji Jeso, "Marartee." Kakusoboning' kayaneng'ung'."⁴³ Nyimatyanit, kimararta aku sob kinyenda, akulosunoto Jehovah. Bani kinero tuye togol kumugul, kugonyit Jehovah.

19¹ Aku kimi Jeso kuwetote kubun aretab Jeriko.² Kimi chii nyekikugure Zakayo ki nyo ou mu togikab aisuru aku kimogoryo.³ Kityeme kuro akinai akibo Jeso, aku kimamuch kuro mu tuye amu kinwach kinyenda.⁴ Kilabat kundoii mu biik akilany mogoiywo sikuro kinyenda amu kibune aranone.⁵ Kineitu Jeso yone, kimarar barak akileji kinyenda, "Zakayo, wolu choku amu kayam rani aru gong'ung'."⁶ Bani kinero biik togol kilenyenyi, kutou kunyinyiyo kibere, "Kiwo kitebe gotab chi nyile kipng'ogiyo."⁷ Aku kitonon Zakayo akileji, "Kiptaiyandani, anamu kamas chibo tuguukchu akogoji kibananok, aku ne kiaibe chii tuguukji mu lambach, awekjini kinyil ang'wan."⁸ Kileji Jeso, "Kakicho rani sorune koyi, amu kinyenda ambo ku weritab Abraham."⁹

Amu kicho weritab chi kusoru biiko chobetyin.¹¹ Bani kitikimi kigase tuguchu, kitas tai kimwoji kalewene amu kilegite Jerusalem, amu kipkote kile muche kucho baunatetab Jehova kuchoku.¹² Kimwoji anyu kile, "Kimi chi anum nyikitokunot nyikiwo kor aka nyolou kuwo kitokjigei baunate si neityo kuwechgei.¹³ Kiguur kiboitineki taman akugoji chepkondokji kiboisie mu mung'ara akoi tuun kuwechgei.¹⁴ Amu kikakisas biik kinyenda ku kiyokto ng'olyo kurupe kinyenda kile, makemache chichone kitikicho kuboivech.¹⁵ Aku kineit kuwechgei, ku kakunyoru kinam baunate, king'at anyu kegur kiboitineki cho kigoji chepkondokji kipka wolo mi kinyenda, si kinai chi kinyoru chi aka togol mu mung'arenyi.¹⁶ Aku kicho nyibo tai akile, "Kiptaiyandani, kianyoru chepkondok alak taman mu chi kigono."¹⁷ Kimwoji kinyenda kileji, 'Kiaiy nyakararan kiboityondoni kararan. Amu kiyanaksa mu kongering' itinye kimnate iboyu korotinwek taman.¹⁸ Kucho nyibo aeny akile, "Kiptaiyandani, kitasakis mutu mu chepkondokuk mut chi kigono.¹⁹ Kiwolji kinyenda kile, boyu korotinwek mut."²⁰ Kicho aka kinyile akile, 'Kiptaiyandani, aronju chepkondoguk, kikakonorta aratyi anga,²¹ amu kiaiywaing amu ii chii nyokorom. Inemu mu nyi metot, akikase chimekol."²² Kileji chikai kinyenda, 'Kirwogung' mu ngaleguk chikemwa mu koteng'ung' kiboityondoni ya. Kinget inye ile aine chii nyokorom anomu nyi kimogoji ng'wony aku akase che kimakol.²³ Ara kaine simekonorji chepkondokju konorwe nyikiwolowole ndame ngapanyoru ku kakitasakis?"²⁵ Kileji biiko kinyenda, 'Kiptaiyat, tinye alak taman.²⁶ Amwowok ale, chi aka togol nyotinye ketasyini, aku kinyenda nyimatinye, kesare ambo chotinye.²⁷ Ako amutu anyu bunikju kipka wolo amite chikimamach baunatenyu sineityo abar mu tainyu."²⁸ Aku kinebata kimwoe kile nyenyi, kitas tai kuwo akoi Jerusalem.²⁹ Kinewo agoi kirikji wolo legite Betpage ak Betany, mu tulwetab emitik, kuyokto koyoktoiki aeny,³⁰ kileji, 'Aba akoi kokwe nyi legit. Bani kikochut kokwonone, anyoru warwap sikiry nyi tomo kilany chi. Atyach akamutwa.³¹ Netebak chi kile, 'Amune si atyach?' Amwoji ole, 'Mache Kiptaiyande."³² Kiba anyu che kikiyokto akoi kinyoru kile bani kikamwoji kiptaiyande.³³ Aku kinemi bani kitikityoche Moitab sikiry, kileji chi, 'Kaine satyach moitab sikiry?"³⁴ Kuwolji kileji, 'Mache kiptaiyande.'³⁶ Bani kitikiweti, kuitote nguraikwak mu aree.³⁷ Kiwo anyu akoi kirikji ng'wenyutab tulweab emitik, kutou anyu chang'indab kasubik kibaibaitu akulosu Jehovah mu kote nyo ou akibo yautik choechen cho kiiri,³⁸ kile, "Berurot Laitoriande nyi choni mu kainetab Kiptaiyat! Kalye mu kipsengwet ako torornate nyimi barak."³⁹ Kimwoji Parisaek alak chi kami tuiye ako kinyenda kile, "Konetindoni, kaigai kar kong' kasubikuk"⁴⁰ Kuwolji Jeso akileji, "Amwowok ole, nesisyo chwechu ku ambo koichu kumuche kuwokjo."⁴¹ Kinerikta Jeso nganase, kiriir aibo nyone.⁴² Akileji, nde konget betuni bo rani tuguuk choipkok kalya! Aku ra ku kikewiny mu konyekwok.⁴³ Amu pkonjinok betusyek chi tate bunikwok katerusyek mu kamaswek togol akitou kigiching wolo togol.⁴⁴ Akuwirching' ng'wony kiboto ambo lagoguk. Mametoi koi ambo agenga kutonone aka amu kimenai sait nyo kichonjining."⁴⁵ Aku kiwo akoi gotab sautik akutou kimanda togol cho kioldoisye,⁴⁶ akileji kichega, "Kikisir Kele, "Gonyu ku gotab sautik; aku kikaikwe kuloku gotab chorik."⁴⁷ Aku kinetisye Jesu betusiek togol mu gotab saet. Kiwosote kinyenda tisik cho echen kiboto siriik kiache si king'om amu ki kandoik kichega chebo biik.⁴⁸ Aku kimonyoru wolo muche kwai kiy amu kimi biiko togol kigase iit kinyenda kikaram.

20 ¹ Aku kinemi bani nete biik mu betu aka, mu kanise, akwomtoi logoiwek chokorornen, kipkonji kinyenda tisiik cho echen kiboto siriik, ako boisieki kiwase kinam Jeso.² Ako kimwoji kinyenda kileji, "Mwoweche iyoe tuguchu mu kimnatetab ng'oo? Aku ng'oo nyaakigoning' kimnatoni?"³ Kiwolji akileji kichega, "Atebenok ambo anenda tebut akowolwo.⁴ Kabatisanetab Johana ku kibunu kipsengwet nde kibunu biich?"⁵ King'ololjigei kichega bingo kile, "Nekimwa kele kibunu kipsengwet kile kwaine si mayan kinyenda?"⁶ aku nekimwa kele kibunu biich, kuwirech biiko togol mu koin; amu kiyane kichega kile ki maotyo Johana."⁷ Kuwolu kile, "Makunget wolo kibunu."⁸ Kileji Jeso kichega, "Ambo ane kimomwowok kimnate nyo aiye tuguchu."⁹ Aku kitou kimwoji biiko kalewenoni kile, "Kimin chii sabibu mu mbar akimotoji meik akiwo kore aka kitabe betusiek chatya.¹⁰ Aku kineit betu kiyokji otwokin meichoche si neityo kugoji kichega kinyenda logoekab mbaranone. Aku kibir meik kinyenda aku oon kuwo kileen.¹¹ Aku kiyokto kinyile otwokinde aka; aku kikibir nyone kinyile aketewer akeoon kiwo kileen.¹² Aku kiyokto kinyile nyibo somok aku kikigoten kinyenda aketorji sang."¹³ Aku kile chitab kobo mbare, "Aiy nee anyu? Ayoktoi werinyu chamanenyu: ntime ngaab kugonyit kinyenda.¹⁴ Aku kinero meik kinyenda, king'ololjigei kichega kile, "Nyenyi nyi nemi kayain kibinji tuguuk: ngebar anyu si neityo kendii tuguuk."¹⁵ Aku kikitorta kimang'ta mu mbaretab sabibuk akibar. Itoi nee anyu chitab kobo mbare biichoche?"¹⁶ Choni anyu kinyenda akibar meichoche togol, akigoji biiko alak mbaretab sabibuk." Kinegas kichega, kimwa kile, "Olo, matikany kuloku nyone."¹⁷ Aku kimilji kong' kichega akile, "Nee anyu nyi kikisir kele, 'Koita nyakitai tegik, ku kiaiy nyone kuloku koitab luuita?"¹⁸ Aku chii aka togol nyabutyini koitanone kuile kunyaknyakene; aku kinyenda nyabutyini koitanone kunyirnyirake."¹⁹ Aku kiws siriik ako tisiik cho echen kimache kinam kinyenda mu sainone; aku kiywai kichega biiko: amu kinai kile kimwoe kalewenoni akibo kichega.²⁰ Aku kiriboto kichega kinyenda akuykt sageik, cho aitogei kuloku chibo imanda, sineityo kiname kinyenda ng'alekji, sikikoito kinyenda kuwo taitab baunate ako kimnatetab bauninde.²¹ Aku kitebe kinyenda kile, "Konetindoni, kinget kele imwoe akinetisyo mu imanda, aku metiy chi, aku ineete iman aretab Jehovah.²² Ara chamtoi ng'atutek kegoji kodi Kaisari nde olo?"²³ Aku inai Jeso ng'olseng'wang' akileji kichega,²⁴ "Aborwo dinarii, bo ng'oo itondoni ako sirutek chotnye?" Aku kile bo Kaisari.²⁵ Aku kileji kichega, "Agoji kaisari tuguuk chibo kaisari, akogoji Jehovah tuguuk chibo chibo Jehovah,²⁶ Aku kimomuche kiname mwayanone mu taitab biiko, aku kikwong'io mu wolunenyi akisiisyo.²⁷ Aku kipkonji kinyenda sadukaik alak, kichega chimwoe kile momi ng'etye aku kitebe kinyende kile,²⁸ "Konetindoni, kisirwech Musa kile, 'Nema wereng'wang' chi, akutinye chepyose nyitomo kisich lakwa, kundiye wereng'wang chepyosonone sikiloichi ma wereng'wang'.²⁹ Kimi anyu werik tisabu che kitupcho, aku kiobisyo weri nyibo tai, akima kimosich lakwa,³⁰ aku kindiy weri nyibo aeny;³¹ kile nyone ambo nyibo

somok, akoi kile nyone ambo nyibo tisop, kiboku togol kimosich lakwa.³² Aku kinebata kima ambo kinyile muraranone.³³ Koyoin mu ng'etyee anyu kuloku chepyosetab ng'oo mu kichega? Amu kiop kichega togol ku tisop."³⁴ Kileji Jeso kichega, "Obisyo werikab betusyecheu akugoitoi keib.³⁵ Aku chekiite kele michini kunyuru betusyechoche pkoni, ako ng'etye mu chi kikubok, ki mmatuun ibisyo nda kegoito keob. Amu makumuche kibok akoi, amu kargeitu ako malaikain, aku kichega ku werikab Jehovah, amu werikab ng'etye.³⁷ Aku ng'etsoot che kikubok amu kiboru ambo Musa mu srutik cho tililen. Bani kikkisir akibo karti nya kilaye bani kikure kiptayat Kamuktaindetab Abraham, ak Kamuktaindetab Isak, ak Kamuktaindetab Jakobo.³⁸ Kinyenda ku ma Jehovetab che kikubok, aku b chi sapsoot amu sapsoot togol mu kinyenda."³⁹ Aku kiwolji siriik alak kileji, "Konetindoni, kaimwa kikaram."⁴⁰ Amu kima tikikany kichega kitebe kinyenda tebut aka togol kinyile.⁴¹ Aku kileji kichega, "Taptoi ano si kimwoe kichega kile, 'Kristo ku weritab Daudi?'⁴² Amu kimwa Daudi kinyenda mu bukuitab tyenwogikab kolosune, kile, 'Kileji kiptaiyande kiptaiyandenyu Tabe eunyu nyibo tai'⁴³ Akoi aiy bunikuk kiloku Ng'echeretab kelyeguk."⁴⁴ Kure anyu Daudi kinyenda Kiptiyande kulokundoi ano anyu werinyi?"⁴⁵ aku kimwoji anyu alamalyenyi kigase biiko togol kileji, "⁴⁶ Aripgei mu siriik chi chame kibetote kilochenguroik chi koen, akichame torochisyo mu siiro, ako ng'achorosyekab tai mu kanisosyek, ako kamaswek chibo tai mu tumwek;⁴⁷ Akisare mosogik korikwak, akusoe satek cho koen kung'oolse; tuun nyoru chwechu kirwoke nyo ou kisiir."

21 ¹ Ako Kirk Jeso mogorek kugojine lolee konunoikwak kakochinoikwaak. ² Ak kiro anyu mosokee aka nyo kikibanania kugojine sentisiek aeny cho mengechen³ Ak kile amwowok iman ale kochoru kibanania cha chang kisiir chi tugul.⁴ Amu konemu chu togol mu chang'indang'wang' solo kigojini konunoik ako kakugoji kinyenda mu banandanyi togol cho katinye akob chikasabe⁵ Ama kingota kongololi alake akobo ole kikitektai ak kekararanda kapkorosie (hekalu) eng koik cho kororonen ak ole kikoitoi konunoik kole.⁶ Eng anyu tuguchu tugul oroti (otobene) ko tun Bwanei betusiek che mangetu koi akot agenga eng barakutab ake kiwirjini ingony tugul.⁷ Ako kikitebe keleji konetindoni logu tuguchoche ak kole nee kabarune yo machei kuriku tugu choche.⁸ Ak kiwalu kile oripkei si makibetok amu tun Bwoni biik cha chang eng kainenyu ak kobere (kole komwole) inyenda onai ole kakori betusiek amarubek icheka.⁹ Kogeny ye tun ogas akobo ligosiek, bororiosiek chorsosiek ma cholio(maorogenso) amu kayam (kanyol) koborukei tuguchoche korok kosib kosulda asi kotonon kagesune.¹⁰ Komwaji anyu icheka kole tun komi luk. nyo bwoni bororie ake kosetini borororie ake ambo laitoria ake kosetini bouninde ake.¹¹ Ak kotoku anyu bororiosiek cho kondoni (choeechen) chobo ingony ak kotoku rubosiek (kemeusiek) cho chang ak kobwa korotwo cha chang koboto kamuisosiek ak kaborunoik cha chang cho bunu kipsengwet.¹² Ago ngo tomo kotoku (kobitii) tuguchu tugul konemok konok eng euno kwak ak onyalilak ak komutak oba. sii nagokisiek ak korkorosiek komutik taitab alaitorinik ak baunik akobo kainenyu.¹³ Oyu ku baornat eng okwe.¹⁴ Oleku anyu chobo kchinotin eng mugulwekwok asi masib okerer met akobo ole owotundoi ngal.¹⁵ Amu akonok kuti ak ngomnate nyo memuche bunikwok tugul kota kotebenak kiy anan kota koratak (kokikohok) kotitirok.¹⁶ Amu nhwektok (altok) sigikwok akot tupchosiekwok koboto biikab orengwong ak chorondok ak kebar alak eng okwe.¹⁷ Ak kowechok (kosasak) biik tugul akobo kainenyu.¹⁸ Ako mabetei akot sumeiyo agenga nyo mi mati weikwok.v 19 Ako eng muita engwong onyuru sobonwekwok.²⁰ Ara anyu ye tun oker (oro) lugosiekab bororiosiek kemut (koyomu) jerusalem onai ole kakorik ngemisienyi (kakesune). ²¹ Olebetie (ngoniji) omwechi tulonokab judea ak omanda cho mi kwenetab kokwo nyone (nganasanyone) ak konaba orit okwe chomi koronone (ememonone)²² Amu chu ko betusiekab mugetut (yaktae) si kobiit kosulda (kotoku) tuguk tugul che kikisir.²³ Bwoe eng icheka chetinye chereritos (chorere) eng betusiechoche amu biitu(biichindo) kolkolie nyoo eng ingony ak nerekek eng biiko.²⁴ Ak kobutio cha chang eng ngatibindab orwetabchok ak kemut che kakenam (lulenik) koba ole mi bororiosiekab jerusalem akoi kosulda betusiekwak.²⁵ Asi kotoku (kobiitu) kabarunoik eng asista eng arawa ak eng kokelai (kechu) ak kotoku eng ingony kolkolindo (koromna) nyo korom eng boronosiek bekjine nyo mi kemute Ararai (nyanje) boeko komuldoik.²⁶ Ak komeiyo (koboku) biichi mugulelwo eng cholotio nyobo kaywesio amu kaywaetab tuguchoche bwoni ingony amu itimdime kimnatosiekab kipsengwetisiek.²⁷ Amu betunone kero nyu weritab chi kochoni eng boli eng kimnatetab torornate nyo o lilindonyi.²⁸ Ak ye kakiro anyu koyaekis tuguchoche tugul ongetmet (oyatmet) ekwok. otoben barak amu kakorik katia natngwong.²⁹ Ak kimwachi icheka kalewenoni kole oro mogoiiyo ak ketik tugul.³⁰ yo kongarngaritu sosek (ingatio) onai ole kakoriku kosigie okwe.³¹ Kongeny onai anyu okweka ole yo koyaikis tuguchoche kokakoriku alaitornate baunatetab kamuktainde.³² Amwowok iman iman masiirtoi ibini ko masulda tuguchu togol.³³ Siirtoi kipsengwet ako ng'wony ako masiirtoi ng'alekchu.³⁴ Ako oripkei anyu okwekei si manyi mugulwekwok (kinyandi) sunondi, bokit, ak kaimutab sobetab betusiechu (konyachak) kochonjok kou meste(kombo).³⁵ Lenyone anyu kombe yaani maste chochini chi tugul nyo menye ongoni komugul.³⁶ Oripse anyu betut ake tugul ak osoe si kobiit obelisie (otertisie) ak ochililie eng tugucoche bwoni ak otono taitab weritab chi³⁷ Ak kinetisie eng kapkorobu (hekalu) beti ake tugul bet ak kimandoi kemout ake tugul koweti kotebe tulwe nyo kigure tulwetab Emitik.³⁸ Kimishini inyenda biiko tugul eng kapkorosu si komuch kogas inyenda.

22 ¹ Kikakilegitit any tumdo nyibo makatinak che makiware biita, nyikukuree Paska. ² Aku kiwase anyu tisiik cho echen ako siriik wolo bartoi Jeso, ako kiywai kichega biiko.³ Aku kichut chesawil orititab Judas, nyi kikuguree Iskariot, nyi ki agenga mu taman ak aeny. ⁴ Kiwo Judas kung'alal ako tisiik cho echen, ako kiptainak, wolo aldoitoi Jeso mu kicheka. ⁵ Kiboiboitu anyu bichoche aku kichomnyeji kugoji kinyenda rapiya. ⁶ kicham anyu kinyenda , aku kiwas boroin nyomuche kwalda mu wolo ma legite biich.⁷ Aku kiit anyu betutab makatinak chimokiware biita, betu nyi kiyenye warwab kecha nyibo paska. ⁸ Kuyokta anyu Petero ako Juhana, kileji, " Aba anyu si achapkech amitwogikab paska si keam ." ⁹ Kileji, " Imache keba kechapee ano?"¹⁰ Kuwolji kichega kile, " Aroo, bani omong'jini nganase, akotuye chii

nyakalabe torop beiy, arup kinyenda wolo weti agoi goot oriit. ¹¹ Aku omwoji chito nyibo goot oleji, ' Tebe konetinde kile mi ano gootab taek, wolo amuche aame paska kiboto koyoktoiky. ¹² Kuborwok anyu goot nyo oo nyimi barak nyi chobotin tuguuk togol: achab anyu mu wolone. ¹³ Kiba anyu , aku kinyoru kile wolo kikakemwoji. kicheb anyu amitwogik chibo paska. ¹⁴ Aku kinemi bani kii sait, kitebi ng'wony kinyenda kuboto kayoktoiky. ¹⁵ Akileji kichega, "Atinye magee nyo oo aam paskaini kubotok kitomo anyalil. ¹⁶ Akomwowok ale, ma koome kinyile agoi kusulda mu baunatetab Jehovah. ¹⁷ Kinam Jeso kukombee, aki bani kikugoita kongoi, kile, " Anam nyi, akapchaichigei akwekee. ¹⁸ Amu amwowok kile, mo koyee kinyile chebo logoekab sabibuk agoi kiitu baunatetab Jehovah. ¹⁹ Aku kinam makatyande, aku bani kikugoita kongoi, kibutit, akugoji kichega akileji, " Nyenyi ku bortanyu, nykukoitoi akubo akwee. Ai kile nyenyi sapkatena. " ²⁰ Kinam kukombee kinyile bani kikuwany amitwogik chibo kaseleny, akile, " Nyenyi ku kukombe nyibo ararutye nyoleel mu karatiky, chikitartoi akubo akwee. ²¹ Aku amararte kikaram, mito eutab chito nyo aldoyo yweyu kuboto mu mesani. ²² Amu weti weritab chii kule bani kikagemakta. Aku pwo mu chichone aldoyise! " ²³ Kutou king'alal akwekee bungo akutebegei kibere si kele ng'o mu kichega nyoie kile nyenyi. ²⁴ Kung'eet kinyile poloto mu kichega akubo sikele ng'oo mu kichega nyo ou. ²⁵ Kileji kichega, "Laitorinakab koree ku kiptainak mu kichega, aku kimnate mu kichega keguree ayiik chibo tuguk chokororneen. ²⁶ Aku masikyini kuloku nyenyi mu awee. Aku akany kuloku chii nyo ou mu akwe kikargeit ako chii kamining' aku kinyenda nyo ndoiye kaigei chii nyo otisye. ²⁷ Amu ii, ng'oo nyo oou, kinyenda nyi tebe mesa nde nyenda nyi boisy? Ma kinyenda nyi tabee mesa? Aku amine kubotok aku anenda nyoie boisy. ²⁸ Aku akwee cheki katas tai kuboto ambo mu katyemutiky. ²⁹ Kikachopkok baunate agob ntachopko ambo anenda aboonyu baunate, ³⁰ kile si neityo omisye akoiyese mu mesenyu mu baunatenyu, si tuun atebisot ng'echerokab baunate orwokinyi ortinwek taman ak aeny chebo Israel. ³¹ "Simion, Simion, marartee kikaram, maching' chesawil, kile sa sesing kile nganu. ³² Aku kikasoung kile kitimachunda kayaneng'ung', Bani kaiwechgei let kinyile, ikimit tupchosyekuk. ³³ Kileji petero kinyenda, " Ki ptaiyat, achobot keba tuwai ne ko korkoret, nde kimeiya. ³⁴ Kuwolji Jeso kile, " Petero, amwowung'ole, kutomo kichai kipsoiwo mu betuniyeni, ku itoyo kinyil somok bere mengotoo. ³⁵ Kimwoji anyu Jeso kichega kile, " Bani kioyoktok ku kimotinye lol,nde lengu, nde kweron, ibere kibetwok kiy? " ³⁶ Akumwoji kile, " Aku ra, nyitinye lole, ikany kwop, aku kile nyone ambo nyotinye lengu. Aku kinyenda nyimatinye rotwob chok ku agoi kwalda nguryenyi akwoljigei agenga. ³⁷ Aku amwowok kile, kiyo kikisir akubo anee ku agoi kusulda, ' kikiit kinyenda ako kiptengekinek. ' Amu kiyo kikisip kemwa akubo anee ku agoi kusulda. " ³⁸ Kimwa kicheka kile, " Kiptaiyat, roo! mi yu rotonikab chok aenyu. " kileji " Kikiyam. ³⁹ Kimmong'u sang' anyu, akuwoagoi tulwetab Yemitik kile ataptanyi, aku kirup alamalye kinyenda. ⁴⁰ Kinemi bani kikiit woline, kileji kichega, "Asai si mochutok katyemutik. " ⁴¹ Kuwo taban katigin mu kichega wolo lee nekiwirta koi kuite,kugutuny akusai, ⁴² kile, "Aboo, ngicham iistoeno kukumbani, aku ma kile magenyu, aku nguayak kile mageng'ung'. " ⁴³ Ako kimong'ji kinyenda malaikaiyandeniyikibunu kipsengwet kicho kukimit kinyenda. ⁴⁴ Aku bani kimi kinyenda nyalilda nyang'wan, kutastai kisai ksob aku kikargeit kayotiky ako keretichi tokjini ng'wony. ⁴⁵ bani king'et mu saenyi,kucho wolo kimi alamalyenyi akunyoru kichega kurusoot amu choloty ⁴⁶ ako kileji kichega, " Amune soruiyo? ang'etyo kasai, si mochut katyemut. " ⁴⁷ Bani kitukumi kung'olole, aroo, kimong'u tuiye nyo ou kiboto Judas agenga mu taman ak aeny, kundojine kichega. Kucho kilegitityi Jeso sikileji asak. ⁴⁸ Aku kileji Jeso kinyenda, "Judas, kinye nyi kealda weritab chii mu asak? " ⁴⁹ Ako kineri chikimi ako Jeso kiyo kiayak, kile, " Kiptaiyat , keyapichee mu rotwop chook? " ⁵⁰ Kiyap agenga mu kichega kiboityondop tisiindet nyo oukitil itinyi nyibo tai. ⁵¹ kileji Jeso, " Kikiyam nyone! " Kitiny itikai akusoop kinyenda. ⁵² Kimwoji Jeso tisiik cho echen, ako kiptainakab hekalut, ako boisie che kipka chi ki mamache kinyenda, kikapka kutung'onu rotwoip chook ako kurungus. Kileji , "Ngapka ako rotwoip chook ako kurungus, apkoni aname choriin? " ⁵³ Bani kiomi ako akwee betu aka togol mu kanise, kikimanamanekwe. Aku saing'wong' nenyi iis, kimnate nyibo tuindo. " ⁵⁴ Kenam anyu kinyenda akemut kiwo agoi kotap tisiinde nyo ou. Aku kirup Petero kilou. ⁵⁵ Bani kikulai maat mu kwenutab got akutebi ng'wony togol, aku kitebee Petero kwenungwang'. ⁵⁶ Kuro kiboityonde aka nye chepto mu lapkeiyetab maat, kimarar kikaram akile, " Kimi ambo chichi ako kinyenda. " ⁵⁷ Kutuyo Petero akimwa kile " Chepyosoni, mongetine ambo kinyenda " ⁵⁸ Aku nyimatyana kinyile,kuuro chitaka kinyenda akileji, "Inye ambo agenga mu kichega. " Kuwolji Petero kile, "Chichi, mobane bichooche. " ⁵⁹ Kinebata kiy nyile sait agenga, kileji chitaka, "Iman , kimi chichi ako kinyenda, amu Galilinde kinyenda. " ⁶⁰ kileji Petero, " Chichi, monget kiyo imite imwoe. " Banone kitikimi kungolole, kichai kipsoiwo. ⁶¹ Kuwechgei anyu kiptaiyat, akuuro Petero. ako kipkaat Petero ng'olyondetab kiptaiyat, bani kileji kinyenda, " Kitomo kichai kipsoiwo rani, ku itoyo kinyil somok. " ⁶² Kuwo Petero sang' akiriir mu ng'wonin. ⁶³ Kutou biikai che kiname Jeso kumul akibir. ⁶⁴ Kutuch kinyenda konyin akilejini, " Ngor! kile ng'o nyi katuyung? " ⁶⁵ Kimwa ng'alek chtya chayachen kimwaitae Jeso, akutongoe kinyenda. ⁶⁶ Bani kikakiyeech kore, kuyumgei boisie togol, tisiik cho echen, ako siriik. Kimit kinyenda kuwo kapkirwogeng'wang' ⁶⁷ akujeji, " Ngutii Kristo, imwoweche. " Aku kileji kichega, "Agop ndomwowok kumoyane ⁶⁸ Aku ngiti atebenak, kumowolu. ⁶⁹ Aku king'ete ra akitas tai, kutabee weritab chii eutab tai nyibo kamuktae nyibo Jehovah. " ⁷⁰ Kimwa togol kile, "Ara ii anyu weritab Jehovah? " kileji kichega, "Kikamwakwe ole aii kinyenda. " ⁷¹ Ako kile kichega, "Tikemage nee baornate aka? Aku kikegas achega mu koteniyi. "

23 ¹King'etyo anyu tuiye kimugul akimit Jeso kuwo taitab Pilato. ² Kutou kutaam kinyenda kile, "Kikinyoru chichi kinyere korenyo, akitaye kugoji kaisari kodi, akimwoe kinyenda kile ai Kristo laitoriande. " ³ Kitebe Pilato kinyenda kileji, " Inye laitoriandetab Yahudik? " kuwolji Jeso kile, "kaimwa. " ⁴ Kileji Pilato tisiik cho echen kiboto tuye togol kile, "Monyorji lelut chiichi. " ⁵ aku kisimji ksob kile, " Kikinyere kinyenda biiko mu konetutiky mu wolo togol mu Judea kutoune Galilaya akoi ambo mu wolyenyi. " ⁶ Ako kinegas Pilato ng'olyondonone nebo chichi Galili. ⁷ Kinenai kile bo

kinyenda baunate nyibo Herod, kuyokta kemutyi Jeso Herod, amu kimi Jerusalem betusiechoche.⁸ Kinero Herod Jeso, kibaibait ksob amu kimeche kung'ete keny kuuro kinyenda, amu kikakigas tuguk chatyang akibo kinyenda, aku kimeche kuuro kwong'ute aka kwayak mu kinyenda.⁹ Kiteeb Herod kinyenda mu ng'alek chatya akimowolji kiy.¹⁰ Aku kiyongsoot tisiik cho echen ak sirik ak kutou kumuul kinyenda kiya.¹¹ Aku kiai kinyenda Herod kimining'it ak askariyki ak kumulmul ak kiloky ngurye nyakararan ksob akuwekyi Pilato kinyile.¹² Aku kiloku Herod ako Pilato charwai kung'ete betunone, amu kikakisirgei kichega mu tai.¹³ Kuguur anyu Pilato tisiik cho echen ak baunik kiboto biiko kipka togol,¹⁴ Akileji kichega, " Kamutwa chichi akamwayakwe kile nyere biik, aroo anyu, bani kiateb chichi tebut mu taing'wong' ku monyorji chichi lelut aka togol mu ng'alechoche kiatamekwe kinyenda.¹⁵ Olo, ambo Herod kinyenda; amu kawechwech kinyenda aku aroo nyu, mai kiy kinyenda nyinyoljine meet.¹⁶ Kile nyone anyu, abire kinyenda akatyach."¹⁷ (Amu ki yanat mu ng'atutye ketyach chito agenga mu betutab tuumdo).¹⁸ Aku kibolyo togol kibere, "Istee chichi akityokwech Barabba."¹⁹ Barabba ki chi nyiki kakirat mu korkore akibo pchayate nyi kiai mu nganase, ako barisie.²⁰ King'ololji Pilato kinyile kimeche kutyach Jeso.²¹ Aku kibolyo kinyile kile, "Kargaat kinyenda, kargaat kinyenda."²² Aku kimwoji kichega kinyil somok kileji, " kainee, nee lalutye nyi kai chichi? Monyorji chichi lelut aka togol nyi nyoljine kima." Nyone anyu bani kakabir, atyoktoi kinyenda.²³ Aku kitas tai kibolyo kiya, kimache kile kekargaat. kibelisho anyu boloteng'wang'.²⁴ Kitil anyu Pilato kirwoke kile bani kimoktoi kichega.²⁵ Kutyach anyu kinyenda nyi kikaketorji korkoree mu kabesyet a rumisye. Akukoito Jeso kile wolo kimoktoi kichega.²⁶ Bani kitikimi kimite kinyenda, kinam simion kureninde, nyi kichone koree aka akukoji kinyenda kimurtoyonde kuib kirupe Jeso.²⁷ Aku kirupe tuye nyo oo nyebo biik kiboto chepyosok che woksoot akirirjinote kinyenda.²⁸ Kuwekyigei Jeso kichega akileji, " Tibichu bo Jerusalem, kitimorirchane, orirchigei ak lagokwok.²⁹ Amu oroo, pkoni betusiek chi nemi tuun bere kichega, 'berurotin soonisiek, ako mootin chi mosikisyo, ako kitinai chi moreer chi.'³⁰ Akutou kileji tulono, ' oluulchech', akileji kipteen, 'otuchechech.'³¹ Amu ne aiye ng'al chile chu bani nyaliil keti, kuleku nee anyu bani kikiyam?"³² Aku kimi meren aenyu kipng'okiin che kikimite kiboto kinyenda keba kegeet.³³ Bani kiitu woldo aka wolo kuguure "Terta" ku wolone wolo kikikargaate kinyenda kibote chorikai aeny, agenga mu kamastanyi bo tai, ak agenga mu kamastanyi bo katam.³⁴ Kima Jeso kile, " Aboo, nyoji gaat amu monget kiyo aye." Kutou kipchaijigei nguroiki mu biretab kura.³⁵ Aku kiyong'soot biik kurooti aku imi baunik kurorjini kinyenda kibere, " Kisoru biko alak . Kany kusorugei anyu kinyenda, ngiti Kristo nyibo Jehovah nyelewenot."³⁶ Kichurochur ambo askarik kinyenda, akilekitityi kinyenda, akugoji siki,³⁷ akibere, " Neinye laitoriandetab Yahudik, ne mesarugei." ³⁸ Aku kimi sirutik barakutab metinyi che kikisir kele, "NYI KU LAITORIANDE NYEBO YAHUDIK."³⁹ kutou kuchurochur agenga mu kimng'okiinakai aeny kikakikargaat kile, " Meinye Kristo? sorugei kinyende akisorwech achega."⁴⁰ Aku kar koong nyi aka kileji, " Meiyweinye ambo Jehovah, akimi kirwogee agenga?" ⁴¹ Akubo iman kirwogee nyonyo amu kakikonech kile boisionikyo. Aku ma ai chichi kiy nya ngaya."⁴² Akimwa kile, " Jeso, aipkata tuun bani ichoni mu laitornateng'ung'."⁴³ Kleji Jeso kinyenda, " Amwoung' iman ale, king'ete rani kemi tuwai Paradiso."⁴⁴ Aku ki wolo bo sait lo, kutou kiimen eme togol agoi sait sogol.⁴⁵ Aku kimkileye asis. aku kibalak angee nyibo kapkoros kipkane aeny.⁴⁶ Kuwaach Jeso mu kote nyo ou kile, " Aboo, kagonor sabondanyu euneguk." Bani kimwa kile nyenyi, kima kinyenda.⁴⁷ Aku kinero chemogetab kiplukotinek bogol kiyo kiayak, kulosu Jehovah kile, " Kibo iman chichi ksob."⁴⁸ Bani kinero tuiye togol chekimi kubaoriane kiyo kiayak, kuwektagei kuluchotagei tagat.⁴⁹ Aku kichega togol che kinget kinyenda, ako chepyosoi che kirupe kinyenda king'ete Galili, kutonone taban kuroti tukuchwechu.⁵⁰ aku aroo, chito nyiki kugure Joseph, chito nyibo kapkirwok. Ki chii nyakararan kinyenda. Kimayan chichi tetutikwak ako boisieng'wang'. ki chii nyi kibo Arimatea, kokwetab Yahudik, aku kiwese kinyenda baunatetab Jehovah.⁵² Kiwo chichone wolo mi Pilato kuwo kusoom bortab Jeso.⁵³ Kuwolone kucho ng'wony , akirte anga nyotilil, akikelepchi kebene nyibo koita, nyekitomo ketupchi chii.⁵⁴ Aku kibetutab kechapkei amu kikakirigu sabato.⁵⁵ kikapka chepyosoi chi kimi akombo Jeso kurupu, aku kiiri kebene ako wolo kikikonorta bortanyi.⁵⁶ Kuwektagei kiba kichop nyomdutek ako mwaita. Akumuuny mu betutab sabato kile bani mwoioi ng'atutye.

24¹ Ako karon mu betutab tai nyibo wiki, kipka agoi kererit, kutung'onu mwanik chong'utoi cho onyinyen che kikichabe.² Kunyuru kikemilda koita mu kererit.³ Kuchut oriit, aku manyoru bortab Kiptaiyat Jeso.⁴ Ak kingap monyuru borto, kukwong'io akubo nyone. Oroo anyu, kiyong'soot murenik aenyu mu wolo lekite kichega, cho kitinye nguroik cho talilebich.⁵ Bani kitikimi kucholsoot chepyosokai akung'uruch togochikwak agoi ng'wony, kileji chepyosokai, " Amunee si tomi awese nyi sabe mu chikikimeiy?"⁶ Makimi yu, aku kikeng'et: anaan kiy nyikimwowok bani kitikimi Galilaya,⁷ kibere akoi kekoji weritab chi eunekab bikab ng'oki, ak kekargat, aking'et mu betutab somok kinyile."⁸ kunaan anyu ng'alekyi.⁹ Ak kuwektagei mu kereri akiba kimwoji ng'alechu togol taman ak agenga ako alak togol.¹⁰ Ki Maria magdalena, Joanna, Maria kametab Jakobo, ako chepyosok alak chekimi kibote kichega chekimwoji che kiyoktoi ng'alechoche.¹¹aku kiiri bichoche ng'alechoche kile tongoi aku kimayan chepyosochoche.¹² aku king'eet Petero akulabat akoi kereri, king'urukso, akimamar oriit, kuuro nguroik kibat. Kuwechigei Petero gaa kukwong'ote mu kiyo kiayak.¹³ Oroo anyu, kibeti kichega aenyu betunone kokwe aka nye kikuure Emau, nye kibandaab mailisiek tisop king'ete Jerusalem.¹⁴ kimi king'ololjinegei akubo tuguchwechu togol kioyogis.¹⁵ Kimi kile nyi, bani kitiking'olole, akitebtebegei tugun, kicho Jeso kirikiyi kichega akiba togol.¹⁶ Ako kigar kiy konyekwak simanai kinyenda.¹⁷ Kileji Jeso kichega, " nee ng'alechu ang'ololekwe aenyu akobet?" Kutononio kineregotin.¹⁸ Kuwolji aka mu kichega nye kikukuree Kleopa, akileji, " Iinye too kityo mu Jerusalem nyi menget tuguk che kioyogis mu wolone betusyechu?"¹⁹ Kileji Jeso, " Nee tuguukchuche?" Kileji, "Tuguuk chekioyogis akubo Jeso nyibo Nazaret, nye ki maotio nyekioye kwong'ut choeche, ako ki konetinde nyo ou mu taitab Jehovah ako biiko togol. Ako kikoito tisiik choeche ako kirwogik, akerwokiyi kirwoke nyibo mei akekargat

kinyenda.²¹ Aku kikumong'u kele kinyenda nyotioche Israel. Ee, akinyesire togol, ku ra ku betutab somok king'ete kwoyogis ng'alechu.²² Aku kinyile, kugonech chepyosok alak chi cham kemi togol kwong'utye aka bani kikamusta kereri karoon.²³ Bani kimonyoru bortanyi, kipka kuboronu, kiiri kinyile ng'ong'ut kubunu malaikain chekimwa kile sabe kinyenda.²⁴ Aku kiba akoi kereri murenik alak che kikimi togol akunyoru kile bani kimwoji chepyosokai. Ako kimaaro kinyenda.²⁵ Kileji Jeso kicheg, " Ee, solwoichu, aku aye mutyo muguleikwok kuyan mu tuguk togol che kimwa maotik!²⁶ Kimonyolji Kristo kinyalil mu tuguchu sikiwo agoi torornatenyi?"²⁷ Aku kitou king'ete Musa ak mu maotik togol, aku kiborji kichega mu sirutik togol ng'alek akibo kinyenda.²⁸ Aku kinerikta kokwe wolo kibeti, kuwo Jeso kile mache kusirto.²⁹ Ako kisoom kichega kile, "Tebe kibotech amu kikirikta kiimen." Aku kiwo Jeso kitebi ako kichega.³⁰ Ak bani kitebi togol ng'wony si kwomisie, kinam makatyande, akiberur, akubutil akugoji kichega.³² Kilejigei kichega, " Kimoloyotin muguleiwekyo kineng'ololwech mu aree, bani kuyotwech sirutik?"³³ Ak king'etyo sainone akiwektagei Jerusalem. Kutuyo ako taman ak agenga kururuchagei ako che kimi ako kichega,³⁴ kimwoe kile, " Kiking'eet Kiptaiyat ksob, ako kiborjigei Simion."³⁵ ako kimwoji ng'alek che kiiyogis mu aree, ako wolo kinaita kichega Jeso bani kubutile makatia.³⁶ Bani kitikimi kimwoe ng'alechu, kutonon Jeso kinyenda mu kwenung'wang', akileji kichega, " Ngimi kalye kibotok."³⁷ Aku kicholyo akuyweisy akubere kichega kiro tamirmir.³⁸ Kimwoji Jeso kile, " Amunee socholye? Aku aunee sikimong'u tebutek mu muguleikwok.³⁹ Aroo eunekyu ako kelyekyu sanai kile ai kinyenda. Atiinyo akarota. Amu matinye tamirmiryo banyek ak kowoi, kile bani oroto atinye."⁴⁰ Bani kikumwa kile nyenyi, kuborji kichega eunekyi ako kelyekyi.⁴¹ Aku kitomo kuyan kichega amu boiboie nyikitinye ako kwong'utek. Kileji Jeso kichega, " Otinye kiyo kyome?"⁴² Kugoji kinyenda komos nyibo samakya nyikikiwatan,⁴³ kinam kinyenda akwaam mu taing'wang'.⁴⁴ Kileji kichega, " Chwechu ng'alekyu chekiamwowok bani kiomi ako akwee, kile togol che kikisir mu ng'atutek chebo Musa ako maotik ako mu tienwogikab kalosune akibo ane ku agoi kusulda."⁴⁵ Kiyat anyu ng'omnotoshekwak sikinyoru kinai sirutek.⁴⁶ Kileji kichega, " Ako kikisir kele yamagei kinyalil Kristo akung'eet kinyile mu chekikubok mu betutab somok.⁴⁷ Yamagei anyu kemwaita akibo sugune ako nyoetab gaat chibo ng'okiswogik mu kainenye mu koorotinwek togol, kutoune Jerusalem.⁴⁸ Aikwee baorinak chebo tuguchu.⁴⁹ Aroo, ayokwok kayomiseta Aboonyu. Ak ang'otu mu nganase agoi kelokwok kimnate nyobunu barak."⁵⁰ Ako kindoiji Jeso kichega agoi kiit wolo legite Betania. Kwop eunekyi barak akuberur kichega.⁵¹ Ako kiayak kile nyi, bani kitikimi kuberure kichega, kimete kichega akekalab kuwo barak kipsengwet.⁵² Kutou kulosu kinyenda akuwektagei Jerusalem mu boiboie nyo ou.⁵³ Ako kimi knise betusiek togol kulosu Jehovah.